

晚晴移詩匯

晚晴移詩匯卷一百八十五目錄

閨秀

周映清 二十七首

李含章 三十首

葉令儀 六首

葉令嘉 一首

葉令昭 一首

陳長生 八首

周星薇 一首

何若瓊 一首

蔡桓 三首

胡愼儀 六首

胡愼容 七首

戴韞玉 五首

陳瓊蒞 一首

陳瓊圃 四首

沈芬 一首

戴佩蕸 一首

戴佩荃 二首

戴詠繁 一首

方芳佩 十五首

張藻 十五首

張綯霄 三首

周月尊 四首

畢慧 五首

李筠仙 一首

錢孟鉏 二十首

莊素磐 一首

王采薇 十首

何玉瑛 十一首

劉希班 一首

方芬 三首

思柏 二首

廖雲錦 二首

張芬 七首

沈縵 十五首

張因 九首

朱滿娘 一首

方婉儀 六首

吳蕙 二首

屠蒞佩 一首

佟素衡 一首

施坤 二首

商可 八首

鞏年 二首

牟氏 二首

鄭鏡蓉 四首

鄭雲蔭 一首

鄭青蘋 一首

鄭金鑾 二首

蔣佩玉 三首

查女 一首

何桂枝 一首

董文 一首

徐德音 十一首

韓氏 三十一首

彭玉崱 五首

沈彩 二十二首

姚世鑑 一首

張粲 九首

王煒 一首

呂坤德 一首

汪瑤 一首

顧有容 二首

王筠 一首

史筠 三首

周瑤 一首

王瑤湘 二首

許飛雲 二首

商采 四首

錢聚瀛 三首

金孝維 三首

陳爾士 五首

晚晴移詩匯卷一百八十五

閨秀

徐世昌

周映清字院湄歸安人同縣乾隆甲戌進士湖南布政

使葉佩蓀室有梅笑集

詩話晚淵嫻吟詠教子女有法迨世後丹穎方伯繼娶晉甯李氏亦工詩有藥香詩草與梅笑集同編署日織雲樓詩合刻梅甯祝正塘太史題詩云清詞麗句各生春氣類翻疑感召神莫向鵲波亭上望風流只一管夫人

梅花

古梅生疏香幽致邈難寫臨風濯寒秀相對足閒雅瓊姿妙天然未許粉黛假譬如歌陽春曲高和者寡開軒涵明月顧影自瀟灑惟應翠袖人亭亭伴林下

愛梅入骨髓思作梅花吟橫斜疏影句謬許孤山林擬議

誤唐突粉蝶兼霜禽竹外一枝好坡老誠賞音何如妙無
言淡然愜素心不見江貫道撫琴不彈琴

謂梅如宰相調羹待異日謂梅如高人迴與枯槁別謂梅
如美女不炫傾城色謂梅如神仙空羨羅浮蝶鑑懷天地
初想像太始雪此意明月知可悟不可說

登峴山

湖光山翠繞城來白塔紅亭罨畫開松竹徑深僧院敞菰
蒲水淺酒船回殘碑誰訪題襟集斷石難呼樂聖杯亦有
登臨無限意何如太傅遠興哀

王石谷山水

清泉百丈飛幽壑茅屋人家隔叢薄白雲在水樹在空漠
漠晴煙下寥廓斷鴻幾點去無迹黃葉一林寒欲落斜陽

何處認前村隱見危橋傍山郭先生畫筆冠當代八尺生
綃氣磅礴不須平遠襲倪黃能以清空見鑱削秋窗對此
足清勝瑟瑟輕寒生繡箔掩圖不敢挂虛堂恐有紅塵一
分著

琴詩

少小慕古韻耽此絲桐清經年事操拊指澀不成聲一朝
得微悟觸手清風生泠泠判雅俗一一爲分明賀若不可
學益我思古情

審絃別其音審調別其字字清音益和累累珠不墜當其
按節初微茫辨同異音字兩不關所貴得其意貞靜淡素
心心至聲亦至不然筆與琵琶宮商豈殊器

宮亦有時激羽亦有時沈苟能識其意變化皆從心不見

思歸樂商調可犯角不見如意娘角調可犯商

對月譜梅花幽香發素腕實聲與散聲緩急可靜按緬思
製譜初猱綽不容亂後人務新聲往往越其畔新聲日以
靡撫琴起三歎古法多不傳何止廣陵散

秋暮南樓偶賦

商飈吹入萬人家窗外輕寒透碧紗極浦每驚歸雁落高
樓況復夕陽斜破蕉淅瀝風如雨瘦菊離披葉勝花極目
晴雲何處望馬蹏荒草隔天涯

游望湖亭

危亭千尺俯溟濛絕頂蒼茫望不窮山勢遠連林屋竇湖
聲直撼洞庭風香臺草樹依雲外笠澤煙波入鏡中七十
二峯何處所長天墨點落青空

過前尙書潘公季馴宅

桑椹春熟乳鳩鳴無復尙書舊履聲蛟斷河壩遺蹟在鶴
歸華表故基傾每嗟興廢逾三癸宅成於前明癸酉迄毀亦值癸酉又三癸湖故名空憶聲名說二丁惟有石麟未辭去溪邊卧看月初生

古意

美玉產崑岡千載埋幽壑一朝出塵氛光氣耀重薄剖璞
得良匠拂拭事礪錯晶瑩無纖瑕素質秉磅礴急投非其
意韞匱甘淡泊忽逢席上聘觀者盡錯愕璠璵遇有時珍
重葆堅確

東山有佳木上棲白項烏晨昏戀舊巢歲暮猶將雛雛成
刷毛羽振翮游上都朝飲蓬池水夕宿瓊苑株亟歸思反
哺豈謂身已孤繞樹三百匝空使尾畢逋哀鳴白雲端蒼

彤帙卷一百八十五
三
昊不可呼

將入都門別南樓感賦

飛花下淺渚岸柳催行舟再拜別高堂雪涕辭南樓茲樓
廿年住縱目娛清幽一旦舍之去攬裾事遠游青天見黃
鵠振羽翔高秋豈不戀舊巢戀亦不能留

高堂有阿母日夕層樓間撫我不離膝慈訓日以嫻齊肩
得予弟嬉戲承歡顏生女亦如兒同此願復艱兒生能反
哺尙有萊衣斑女生終辭家去去何時還

辭家竟何之駕言赴京國道路阻且長渺渺異南北我家
沿長溪菰城近咫尺朝往夕可還尙慮煙水隔何爲遠行
邁千里動塵跡北斗挂層霄望望不可卽

深閨有令範皎皎揚貞儀

謂舅母沈夫人

授我四德箴教我五字

詩深宵待篝火，鑒若形影隨。一朝遽言別，相視涕洟樓陰下。白日戚戚晨風吹，旣去復迴顧，離愁無盡時。

渡揚子江望金山

江天淡蕩朝霞紅，澄波萬頃流融融。舟人解纜渡江去，漸覺帆腳生微風。蒼茫遠樹失京口，舉頭忽現青芙蓉。奔流直下走東海，金山突兀當其中。樓臺明滅晃金碧，有如蜃海浮琳宮。晴煙縹緲飛鳥絕，但見古塔撐青空。我聞此水貫楚蜀，北江下注連南東。天留片石作屏障，直與底柱爭穹窿。坐攬奇景豁胸臆，敢燃犀角窺蛟龍。收帆瓜步一回首，江南千里青濛濛。

揚州

日暮江流鳴咽聲，停橈悵望近蕪城。三千殿腳如雲散，廿

四橋頭自月明螢苑夜游猶有恨雞臺曉夢太無情惟餘
渡口垂楊樹愁損眉峯畫不成

得家書有感

昨夜銀鐙喜綴花平安兩字到天涯細看墨落痕皆淡祇
恐彤闌鬢有華北墅舊游蕪徑暗南樓歸夢月光斜愁來
羨爾中庭樹日暮霜風集子鴉

獨坐書感

明鏡雙眉皺不收天涯旅思尙悠悠簾垂清晝陰疑暮雨
送殘春冷似秋一別駱駝橋下水三年鴻雁影邊愁羨他
短棹江南路緩緩花開唱陌頭

秋夜讀東坡集

笠屐風流邁永和瓣香只合拜東坡文章遠過漆園吏富

貴徒嗟春夢婆萬古峨眉名不沒一身江海命如何談空
莫更誇仙佛心迹曾傳水調歌

令阿緇入學

從來嬌繞膝今已略知間恩義難相掩賢愚自此分棗梨
余自具經傳汝宜勤未暮休歸舍童心懼放紛
低鬟憐阿姊與汝亦齊肩且令拋金線相隨理舊編雙行
知宛轉坐詠愛情圓試看俱成誦今朝若箇先

壬午七夕焚香靜對心境清徹飄飄有凌雲之想

雲際神光果合離仙家自古此佳期試從跨鶴縱山日歷
數驂鸞漢殿時恍憶前身同縹緲偶來下界暫棲遲何時
相逐三山去重攬靈裙織藕絲

嬌女詩

爲長女
令儀作

我家嬌女齊蕙芳媚如春月迴微光終朝據案弄卷軸情
吟婉轉調鶯簧今年十二解聲韻七字五字吟琅琅亦知
弱腕乏警策頗有慧語餘清鏘閨門尙德不尙藝四誠初
不誇詞章豈知陶冶有妙用能使冰炭消中腸溫柔敦厚
本詩教幽閒貞靜傳閨房但令至性得潛發勿務浮豔鳴
荒唐我昔南樓強解事力窮漢魏兼齊梁卽今所得尙無
幾頗覺辛苦難爲償憐汝嬌憨亦不惡豈必劉鮑爭低昂
作詩因汝感疇昔祗恐明鏡生秋霜

李含章字蘭貞晉甯人侍郎因培女葉佩蓀繼室有蔡
香詩草

詩話蘭貞少隨父湘中節署越十六年丹穎方伯攝
巡撫事重至官舍有畫角乍迎新使節春風滿憶舊
妝臺之句其七子山省墓詩曲折盡情
誦者感愴論詩一首殆自道所得也

秋夜露坐

火雲秋未收商氣夕乃至涼颼動木末梧葉蕭蕭墜廣庭
延佇久月影半在地銀河淡無波疏林皎初霽軒南最幽
曠竹露洒寒翠清陰下藤蘿餘香冷荷芰披襟愛晚涼枯
坐竟忘睡夜久鐘漏沈流螢在衣袂

卽景

斜月映疏簾夜色起寒暝行過曲廊西衣上梨花影

萬固寺

山寺不知路忽聞流水聲溪隨巖石轉塔與白雲平古木
上無際幽禽時一鳴松根堪小憩試汲碧泉清

讀王孟詩偶賦

中允文章健筆扛出關無計敢從降新愁應繼庾開府老

淚曾悲張曲江闕下新詞誰第一河中名士古無雙平生別有傷心處幾按岐王樂府腔

彭澤高風許獨攀清姿落落絕人寰月中楊柳詞人去雪後梅花野客閒歸夢應棲桐柏觀羈魂終繞鹿門山若教明主非相棄牀下何因復放還

秦始皇

金虎宮鄰事可憐漫疑鶉首賜鈞天終令六國還三戶空使諸生笑九臬車載輶轡山有鬼舟行縹緲海無仙傷心萬里長城在依舊扶蘇伏劍年

望岱

岩巖帆岬峙神州萬壑風雲在下頭海外天光明野馬寰中人影動蜉蝣金銀氣湧樓臺壯琴筑聲寒草木秋欲拂

宵碑問秦漢苔封恐自有熊留

擬古

崇桂茂山椒幽蘭媚澗阿揚華吐芬馨寂寞無人過時至
亦零落榮悴皆天和灼灼桃李花當春揚姍那容華非不
好攀折常苦多榮名以爲寶勿復辭臧軻

炎洲多珍禽自呼孔與鸞朝栖珊瑚枝夕宿芙蓉田文采
頗自矜矯矯振華翰漢使重珍奇羅網來重巒飲以瓊池
水翼以白玉欄禁林任止宿所食皆琅玕飲啄豈不時引
吭常悲酸遺雛在故山欲往道里艱君莫笑鵲鵲一枝乃
白安

芳葩熙春陽零葉凜秋辰商飈歛以來綠葉成枯薪芬華
旣云逝淡泊全其真直幹淩嚴霜根荄肇先春敷愉安足

特葆璞完吾澹孤生各有志豈惟松柏貞莫嗟風霜慘中有大造仁

我有照乘珠生長薄海曲孕月含清輝光照鮫入屋一朝逢越賈採摘出幽壑獻入明光宮藉以文梓匱金缸同不夜符采爛華幄實至名必歸何必慮魚目

秋夜讀韋詩

山城足秋陰涼意入深屋黃昏疏雨過簷溜斷復續霽色開遙岑簾際映寒綠微雲淡落月餘光入修竹深更人未寢青鐙照幽獨愛此五字詩靜對黃花嘆

三女令昭于歸都門

在家爲客莫言勤此去方知是主人百歲毀譽關阿母一時賢否定諸親金褱畫永儲甘旨玉荀官清課米薪儻輟

餘閒吟謝紫錦囊應寄濟川濱

霍山道中

莽莽晴沙野草枯朔風汾水記征途
山頭麥壟千層出溪畔松陰一徑紆
高閣殘陽飛鵲鳴亂峯積雪走於菟
千秋唐魏遺風在認取平陽古帝都

平定州道中

高嶺鳥飛絕崎嶇路一灣悲風生遠樹
曉霧失前山麥氣荒原下車聲亂石間
千秋燕趙地兀兀見重關

論詩

好詩如佳人嫣然媚幽獨鉛華屏不御
葆此無瑕玉巧笑流瑳那蛾眉騰曼綠
一顧失傾城何必炫奇服又如聞好鳥
應節喧百族引吭揚天和喁于叶絃樂
春花倉庚歌夜

月杜鵑哭微物詎有知聽者感衷曲始知心之聲不在鬬
繁縟笑唬根至性風蕭任根觸勿使天籟乖要令老嫗覺
神充貌自腴至味乃蘊蓄自從齊梁來藻績眩凡自土木
飾金貂珷玞薦文楨旁觀豈不好所苦真意斲蘭若集翡
翠無由起遐矚嗟余少耽吟月露困雕琢牢籠及光景鏤
刻到草木邇來喜平淡綺語久閣束悲歡不自禁涉筆或
累幅色黜剪綵豔聲異叩缶俗婦人職中饋豈事勤著錄
詎知風人志性靈藉陶淑發情止禮義本自三百牘至音
諧官商六義有正鵠吾言或非迂試取反覆讀

武昌舟次

樊山秋月舊登樓又泊蘭橈訪昔游南去山趨平麓斷北
來水入大江流三更畫角魚龍夜十里平沙雁鷺洲卻望

衡湘勞遠憶使星明處是潭州

湘江道中

打槳湘南路疏帆挂雨輕青山如舊識華髮是新生苦竹
深藏寺春潮半入城行人正愁絕怕聽鷓鴣聲

中秋見月感賦

北渚水初落天涯秋已分那知今夜月各照一方雲關塞
渺無極商聲不可聞蘅門風雪早沉瘁劇思君

黃陵廟懷古

君不見湘山高高湘水碧淚痕染徧琅玕色雪浪朝連青
草浮愁雲暮向蒼梧合當年帝女下璇宮瀉酒曾聞禮秩
隆已傍松雲開貳室旋看日月麗重瞳鼓琴衣袵天家樂
星軒雙曜明珠幄阿閣都經素女絃鈞天盡按皇姱曲一

從刻玉下南天翠輦金輿不復還漫比膠舟沈漢水還同
遺劍慟橋山橋山一去成千古九疑天遠留靈瑣玉軼難
乘懸圃風明璫空望涔陽浦涔陽江浦總魂銷更駕飛龍
逐晚潮帝子揚靈江上瑟夫君愁思洞庭簫瑟希簫歇人
何在里俗傳芭猶不改貝闕珠宮事渺茫蘭橈桂柂空煙
靄千秋哀怨起騷人懷古同傷遠別情薜荔秋風山鬼泣
鷓鴣暮雨客船聽竭來倚棹尋遺躅古木蕭蕭階蘚綠廟
火青熒鹿角磯寒潮嗚咽巴陵郭屈賦成時書未焚書生
臆論總紛紜願將北渚江頭水一灑高唐峽裏雲

重至都門

廿年旅夢繫京華此日重看北地花每厯舊游疑隔世暫
休征旆當還家安心莫問門如水容膝何嫌室似蝸劇喜

青藜光徹夜八騶人慢說官衙

外以校書過勤肺疾盛作

無官贏得一身輕轉爲編摩病骨撐寡過年方逾大衍讎
經人欲老更生報恩心重忘疲馬招隱身留未燼檠珍重
年年說長健好期相伴刷黃精

七子山省先大人墓

空餘馬鬣五湖隅不見巫陽降紫都萬里雲山棲大鳥廿
年風雨泣諸雛及門盡望西州樹墓爲吳中門人助築此地曾還合
浦珠回首音容竟何處白楊蕭瑟慘號烏

初歸吳興感賦

楚水燕山憶舊時廿年踪跡總相隨今朝獨返蘋洲棹冷
月寒燈照鬢絲

日知錄卷之一百一十五
每話歸田倍愴神轉頭誰認舊巢痕可憐八里橋邊水難
返三生石上魂

烏上橋南卜一廬辛勤留得大官錢緣知清白能傳後負
郭何須二頃田

弁嶺青連笠澤湄登樓曠望不勝悲報君一語君知否繞
郭湖山似昔時

白雀寺

杏花風細春晴早暫作春游趁春曉曉寒尙覺薄侵人宿
露遙看濃溼草垂楊夾岸拂黃帽官菜千塍映紅襖長松
瘦相認齊梁壞塔殘碑失寅卯入山但覺花更妍到寺始
驚春正好幽尋宛轉見飛葉久坐更番換嘯鳥佛鐙青冷
照千古閭閻朝昏定多少靈雀飛來竟何在曇花現處空

如掃剩有珠旒拜兒女祇聽金鐃鳴可島前生慧業不敢
問後事蒼茫欲何禱歸來但誦佛名經篆煙一縷心香裊

峴山

更無百尺俯層巔扶杖來尋曲曲泉臺榭大都唐以後觴
詩最盛宋中年雲昏喬木遮僧院風約飛花墮釣船日暮
窪樽亭畔望眼前誰是酒中仙

示騶兒應省試

辛苦雞窗問字年此行好著祖生鞭化鯤正厲培風翼射
隼看鳴破的絃良玉試燒三日火元珠怕落九層淵傳經
家世扶陽重厚望須教慰夜泉

葉令儀字淑君歸安人佩蓀長女錢慎室有花南吟榭
遺草

詩話散君六歲隨母周居京師十一即嫻吟詠穎妙
若夙習于歸後居錢塘三載還吳興詩藁盈篋後嬰
疾經年及病劇取舊藁數冊手自刪削十存其一甫逾月歿年三十有二

丹夜

小艇低昂睡不成夜深猶自促歸程滿窗涼月白於雪船
底忽聞魚籊聲

硤石旅次

石屋依危峯三更坐清絕人語悄不聞開門四山月

送琴柯弟之河中官署

不敢留行楫高堂望爾回全家蒲坂隔一棹秣陵開

弟迂道過

金陵歸夢雲千里離愁酒一杯昨宵風雨夕樓外雁聲哀

杏花

鶻鴂聲中春事疏紅芳一樹映吾廬賣花深巷鶯曉後賒

酒孤村燕到初寒雨思歸虞學士春風得句宋尙書瓊林
別有蓬萊種穠李天桃定不如

汴梁旅次

多謝征途半月晴雪消東汴馬蹏輕戍樓落日陳橋驛野
草寒沙博浪城寥落故宮荒蔓合淒涼戰壘暮雲平禹王
臺畔頻回首渺渺長河萬古情

梁宮詞

夜深甘露下空庭齋素長祈佛有靈春罷不知宮漏盡背
人猶誦淨名經

葉令嘉字淡宜歸安人佩蓀次女沈昌培室

寄淑君姊

鴿原分手各天涯風雨連牀願尙賒兩地空煩詩代簡三

春祇有夢還家病多漸識君臣藥別久愁看姊妹花他日
相思勞遠望五雲深處是京華

葉令昭字蘋渚歸安人佩蓀三女侍講學士邱庭滙室
寄淑君姊

繡閣當年共理妝傷心此日各分行寄書已過櫻桃節惜
別休聞芍藥香曉月鳴雞驚昔夢夕陽歸雁感殊方平生
舟楫偏無分枉說江南是故鄉

陳長生字嫦笙號秋穀錢塘人太僕寺卿兆崙女孫巡
撫葉紹楨室有繪聲閣初稟

詩話葉氏閨中自梅笑蘼香以後花南繪聲斐然成
集而翰墨流傳有足資譚助者仁和吳伯宛舍人昌
綬爲寶沈齋侍郎題桂馨圖有云許泊同時趙管難
較量分列入毫端何妨畫日修眉手重振輕描一例
看自莊陳姊姊夫人適歸安葉中丞紹楨爲丹穎方
伯似蓀子婦葉氏一門風雅方伯室周映清李含章

女命儀子婦周星徽皆能詩與婦笙繪弄閣集令刻
行世夫人乃句山太僕女孫至子婦展儀又四世時
琴柯中丞方以庶常攜家在京師夫人書跡常見此
稍不類吾女蕊圖謂細審波磔起訖實出一手當日
詞垣清暇偶戲爲之自云卷軸中罕見此格亦爲後來開風氣矣

秋江晚行

落日下江濤暝色在高樹漁燈生遠岸厯亂不知處微聞
柔櫓聲又繞蘆洲去

花朝曲

去歲花朝花已落十丈殘紅飄繡幕今歲花朝花未開春
風不到蛾原來蛾原已作經年住欲覓春花無覓處空餘
芳草綠萋萋愁說王孫從此去王孫欲歸歸得無孤鐙深
夜聽唳鳥此時卻憶故園柳綠到門前第幾株遙知柳綠
無人折都爲年年不知別今朝灑酒酌花神定祝春花堆

似雪春花似雪不歸家卻看他鄉雪作花莫怪花神無賴
甚不移春色到天涯

初夏

虛堂瑟瑟度南薰炷盡沈煙散午芬沸鼎茶聲疑作雨隔
簾花氣欲生雲嘔心句少吟逾苦信手棋多敗亦欣小倦
不須尋素簟碧闌干外坐斜曛

夾竹桃

穠華爛漫不勝描卻愛迎風翠影搖地擬渭川生錦浪人
來湘浦泣紅潮儘教綽約貞常抱爲報平安恨始銷知有
凌霄清節在不須錯認董嬌嬈

觀音門舟夜

落日金陵渡輕帆此暫停水流三楚碧煙鎖六朝青漁火

殊明滅滄波入杳冥夜長人未寐篷底漏疏星

春園偶賦

賣餠聲裏日初長春滿閒庭花事忙樓外軟風鶯夢暖籬
邊疏雨蝶衣涼碧桃重似垂頭睡紅藥殘如半面妝看盡
韶光應不倦題詩長倚小迴廊

黃陵廟

蒼涼古寺俯明湖芷屋椒堂事有無未辨芳魂來澧浦空
傳清淚灑蒼梧花深紺殿飛蝴蝶月冷青山叫鷓鴣莫向
汀洲尋翠珮湘南到處長蘼蕪

長干曲

儂住長千里離愁動隔年生憎門外柳不繫九江船

周星薇烏程人同知葉紹棻室

悼鸚鵡

羽毛纔就慘青霜敲斷銀環恨渺茫連日誦經知有意昨
宵說夢已非祥綠衣原擬藏金屋丹詔何年下玉皇應伴
飛瓊充鳥使絲雲深處任迴翔

何若瓊字閩霞浙江山陰人布政使葉紹本室

題王澹音環青閣橐

東南佳勝數婁江門第烏衣畫戟雙一片橫雲山色好眉
痕淡寫月當窗

蔡桓字宣卿朱源女錢塘乾隆己卯舉人遂昌訓導吳

題室

詩話補松同年高祖母蔡太夫人至性沖情見諸吟
詠所作甚富而退舟先生杭郡詩輯止錄三首殆橐
多散失

憶父

時遠幕
陝西

小樓雨過燦虹霓
曉鏡慵收晏啟闥
愁倚窗櫺苦吟望
白雲遙在陝城西

插瓶花有感

折枝皆可添瓶供
貴賤看來有小差
一夜繁英都落盡
紫薇不及馬藍花

病中詠秋荷

出塵花品愛池荷
零落秋風可奈何
共羨蓮房多結子
子多贏得苦心多

胡慎儀字采齊號石蘭又號鑑湖散人大興人駱烜室
有石蘭詩鈔

詩話石蘭同夫客嶺南夫死攜家累及五觀北歸爲
閩塾師歷四十年受業女弟子前後二十餘人多以

詩名

客途新柳

金縷毵毵舞態新
額黃初試正宜人
參差灞岸含朝露
掩映章臺報早春
青眼慵舒還是夢
修眉未展畫難真
風流綽約誰能似
張緒當年最得神

侍蔣太夫人滕王閣小宴

章城何幸遇仙儔
會向江樓組勝游
一片夕陽紅蓼岸
數聲漁笛白蘋秋
西山雨過煙光碧
南浦風翻雪浪浮
自愧暫依喬蔭下
敢同蘭桂占先籌

自端溪入羚羊峽

西行過端溪放棹入谷口
千峯疊迴環一水何深瀏
沿津三五家寥落依山阜
巖石淩空虛相對如配偶
老坑生奇

質鬼神日夕守鸛鵒眼難逢蕉葉貴清厚造琢付詞人
文光直射斗龍蛇驚毫端煙雲潑墨後舉目眺兩崖苔鋪虎
豹走俯耳聆渚宮風激馮夷吼山川爽襟懷筆硯吾良友
對此融心神蕭然出塵垢孤鴻一聲來越地鄉心陡

舟行遇暴風雨

逆水行舟嫌道遠旅人悶對難消遣倏忽之間風暴來遙
望高山黑雲捲一霎船顛如簸揚舟子篙亂如飛蝗隨流
未辨泊何處嵐光雲氣紛茫茫東西南北都不辨空中但
聽走雷電聒耳波濤夾雨聲杳冥變幻如流霰此時客懷
心膽寒新愁往事集眉端少年不解離鄉苦老大方知行
路難追思昔日深閨內玉肌綽約飄香佩小鬟扶我傍花
陰弓鞋怕溜苔痕翠甯知中歲苦奔波烈日狂飈任折磨

自憐顚顚風塵裏誰唱紅顏無渡河坐久雲收風雨了餘霞遠帶尖峯小低徊鷗鷺泛清流忘機只有無情鳥

嶺南道中

五槐十三人艱危仗此身經年淚洗面百感痛傷神塞北無茅屋燕南有老親如何千樹雪不是昔時春

歲暮

歲暮催寒景淒然自掩扉眼花看字小身瘦覺衣肥異地人情薄家鄉魚雁稀一心無著處空復憶庭闈

胡愼容字玉亭號卧雲大興人愼儀妹諸生馮烜室有

紅鶴山莊詩鈔

詩話卧雲幼慧方六七歲即能爲韻語稍長伯父授以書一過成誦乃自購經傳古文讀之既而涵泳宋詩心有所得時祖官於粵以卧雲歸馮氏所天非解詩者遂焚棄一切而詩詞已流播人間蔣苕生爲作

紅鶴山

莊集序

望廬山

奇勢環吳楚，崔嵬迴不羣。
峯從天上現，泉借日邊曛。
翠色濃堪摘，嵐光秀可分。
紫煙縹緲處，只許卧層雲。

秋雨憶別

雲暗重門掩，煙深鎖畫樓。
故人千里夢，涼雨一天秋。
別淚灘頭水，離魂江渚流。
悶來誰共語，獨自下簾鉤。

春殘

堂堂春已背，人歸檢點餘光。
付品題曲徑，愁鋪芳草路小。
橋橫斷落花溪，無情夜月能相照。
有恨流鶯，莫亂曉、贏得詩人多少。
意碧桃空老，雨淒淒。

秋夜

白露澄清夜遙空月似盤庭階流素影玉戶不知寒

蘆雁

橫江片影一聲秋楚岸湘波事事愁同是水雲鄉裏客歸
心空悵荻花洲

別景素四姊

姊妹相依久情親勝弟兄忽驚南北別不啻死生盟春夢
人千里秋風雁一聲來宵樓上月空似鏡華明

病中

惚惚魂無定飄飄若夢中扶行驚地軟倚卧覺頭空放眼
皆疑霧聞聲似起風那堪窗下雨寂寞一鎗紅

戴韞玉字西齋歸安人思恩知府永椿女仁和同知陳
崧室有西齋遺稿

城南相送暮寒凝苦愛風流咏絮能

是日微雪

琉璃匣關情隨畫

舫珠簾飛夢繞紅鐙裁書不惜魚頻寄拔宅誰將鼠共昇
此別京華多韻事藍田日暖泮春冰

桃花殘後慨然有作

轉眼殘紅覆水潯可憐結子未成陰沿流不是輕陰薄春
雨春風力不禁

家大人改官潯州恭賦送別

忽傳恩詔出丹墀出守潯江路險巖十載勞民心似水一
身去國鬢如絲浪花蕩漾朱旗捲帆影翩跹碧櫓移謫宦
情深溢浦月登樓夢逐嶺頭枝俸錢散去謀生拙鄉井句
留飲餞遲達命不須嗟李廣望塵無復避元規影形固是
周旋久寒煥難期童僕知紅淚縱橫愁遠道白雲繾綣憶

當時家大人秉臬晉陽予寄懷詩有今夕思親雲是白之句自憐識字原非福爲說

投荒更足悲翹首天涯轉征旆行廚洗手進瓊枝

陳瓊茝字芳余仁和人同知淞女周襄室

詩話芳余母戴西齋工詩芳余與妹閨真並承講授詠絮之傳出自折筮之教焉閨真善畫夫亡殉節

螢

幽叢月不到螢火逗新涼著露沈芳草因風度短牆數來
光不定撲處欲難藏小立香階畔時時點芰裳

陳瓊圃字閨真號鉏月瓊茝妹歸安諸生費錫田室有

紅餘草

自題山水畫冊

路轉千峰一逕斜煙霞深鎖野人家春來更有幽棲處開
遍東風枳殼花

家住江南楊柳灣一蓑煙雨打魚還數聲蘆笛秋風暮飽
看青溪兩岸山

蒹葭深護水雲鄉門掩青山對夕陽吟罷小樓閒眺望晚
風吹起白蘋香

峰含曉日樹含煙野水微茫接遠天如此溪山誰領取風
光輸與釣魚船

沈芬字左嬌歸安人知縣作霖女太僕卿戴璐室

詩話左嬌弱齡有暮春一絕于歸後不復爲詩蒹葭塘
有作時與商定故悼亡詩有云蒹葭花斷少詩章雖
誦多年句有香卻賴推敲
成畏友吟安一字幾商量

暮春

數聲鶉鴂過門巷罷秋千怕看荼蘼架春光又一年

戴佩蘅字蘊芳歸安人璐從女編修閔惇大室

詩話蘊芳與夫相繼逝蘊塘太僕女蘋南書其遺詩
後曰幼與姊同學詩韜晦不以示人今已散佚篋中
藏有丁亥送家大人上京一律墨瀋猶新感而作
詩有閨中亦擅修文筆可是雙雙赴玉樓之句
送蘊塘叔父赴補

晏歲衝寒指帝京
菰蘆思慰倚閭情
編排梨棗謀遺集
孝養陔華急遠征
臺閣大儀綿世德
風流水部繼詩名
鞭絲帽影衝寒去
到及春明聽早鶯
時校刻儀部叔祖詩集

戴佩荃字蘋南一字春淳歸安人璐女仁和趙日照室
有蘋南遺草

詩話蘊塘太僕有哭女詩二十二首序云女歿年僅
二十三明慧能詩兼工畫書體豐碩似非天相而不
永其年方芷齋夫人題其槩云雛鳳分雛後萱庭念
轉深相將游碧落無復辨琴音遺挂空留室情詞已
絕吟昔年傷弱
息振觸淚盈襟

讀厲樊榭集有和閨秀陳坤維丁巳閏九手檢顧秀

野元詩選賣供饘粥詩有感次韻

中饋蕭涼貧可知只餘秀野百家詩
節逢閏九情多感念到先人句更悲
乞米固應煩巧婦封侯何日慰書癡
里居無復徵鍾範空歎秋宵握管時

新燕

羽毛鮮潤望依稀睡足晴窗展翅微
喚母但能啾唧語戀巢猶怯往來飛
棟花庭院春如許梅雨池亭客未歸
睇向畫梁容卜宅爭如隨分著烏衣

戴詠繁字止香歸安人璠女韓汝翼室

永年官署思親

千里思親魂夢牽長宵輾轉未成眠
相憐惟有天邊月半照京華半永年

方芳佩字芷齋號懷蓼錢塘人仁和湖北巡撫諡勤僖

汪新室有在璞堂稟

詩話芷齋早年師事翁霽堂杭堇浦厲樊榭嗣隨宦
勝地與徐淑則錢浣青杭筠圖爲詩友相傳有知人
鑒其父相攸時攜文二首一爲吳韻雲修撰其一則
勤僖也意不能決以示芷齋時吳方爲諸生汪猶布
衣芷齋閱吳作曰是大器也然須晚成父遂舍吳而議
閔汪作曰此大器也然須晚成父遂舍吳而議汪後
卒如其言阮文達作秋桑七律四首和者數百人時
楚北用兵勤僖方官鄂撫芷齋歸里省墓和詩第二
首結句云烽煙未靖人將老閒煞成都八百株嘉慶
丁卯梁山舟學士重宴鹿鳴賦詩四首和者百餘人
芷齋時年八十和詩三首評者謂眾皆不及子婦王
德宜字韞輝金山人亦工詩有綠筠吟稟語鳳巢集
女續祖初繡祖並嫺韻語

雨中看山

連朝掩扉卧襟懷殊怏怏重陰晝亦昏遠色潤書幌忽聞
山雨飛簷溜送清響開簾得奇觀林木何蒼莽豈徒眼界

新足使神情爽擁鼻一微吟揮毫技復癢橫斜字半欹聊以誌幽賞絕愛羣鴉雛衝煙自來往

西湖打魚歌

明湖浩渺萬頃秋荻花紅蓼紫汀洲朝霞散彩旭日上鳴榔棹出千漁舟招呼齊起布巨網迴旋水面風颭鴈錦鱗潑刺駭欲遁亂拋玉尺驚眠鷗漁人生小江湖慣拍天翠浪相沈浮長笛一聲煙際起笑歌歸去咎咎收雲峯不動卧寒碧浴鳬飛鷺還悠悠

初夏書事

日永無塵事山居境轉幽雨歸雲外樹人語竹間樓春去寒仍淺花殘蝶解愁晚窗茶未熟一縷翠煙浮

立秋前一日

轉瞬流光速臨風易作愁芙蓉還映水蟋蟀已鳴秋愛靜
居山境迎涼上小樓井梧如解事爲我少遲留

春興

幽居恰喜近山城樂意相關境轉清雙蝶踟躕林外去一
鶯睨睨樹間鳴盧醫不療煙霞疾高士還深邱壑情精舍
日長閒不得苔錢數徧繞階行

僻處城南一草堂高情自愛水雲鄉臨池每困生花筆得
句旋投古錦囊山送晴暉來畫閣樹分濃翠覆吟房憑闌
莫訝韶光淺春事遲回到海棠

閱書有作

一年彈指又經秋雲物淒涼歲月遒自昔佳人皆有恨由
來名士盡工愁班姬失寵難成賦趙嘏無聊但倚樓莫向

殘編動惆悵可知容易白人頭

山居

市遠山深興自饒數椽聊得避塵囂閒分鳥跡尋花徑曲
引泉流灌藥苗戶外何知有雞犬閨中亦復樂簞瓢幽窗
喜與秋江近欹枕長聽上下潮

西湖雪

湖水莽無痕雲峯失故態猗與芡蘿女遽爾施粉黛

秋夜

繡枕垂雲夢乍醒侍兒愁睡觸銀屏舉裝欲問更深淺露
溼紅衫月半庭

早春湖上遇雨

朱太夫人相招與嚴許諸夫人同游

山色空濛雨更幽落燈風裏作春游劇談往事渾忘倦每

戀清吟爲少留雲起忽遮巖畔寺煙迷時下水邊鷗徘徊
未識梅花面可是歸舟載得愁

懷藻姊書來詢近況賦此代柬

河橋分手惜匆匆數載悲歡事不同至戚已從生死隔故
交惟有夢魂通噉名漫學屠龍技處世今如失馬翁問訊
蘭閨無恙否莫教惆悵對飛鴻

含毫每欲寫相思一紙離愁不自持連月江山頻入夢經
旬燈火罷談詩浮雲世態無今古流水韶光感歲時一語
寄君應絕倒此生竟爲讀書癡

哭翁霽堂先生

少微星忽隕寒芒天喪斯文巨壑藏四海長留知己感一
生祇有愛才忙楷模自足垂當代猿鶴空驚去草堂聞說

故交銘有道定看金石耀琳瑯

詠紙鳶

翦紙爲形骨相寒常依稚子博悲歡偶然得藉微風力卻要旁人仰面看

張藻字于湘鎮洋畢鏞室湖廣總督沅母有培遠堂集

詩話靈巖少孤諸經多母氏口授乾隆四十五年御書經訓克家四字以賜培遠堂集四卷久佚其元孫蔭笏蒐訪遺詩刻入河間詩集

近得沅兒出撫秦中之信因作詩以箴之

讀書裕經綸學古法政治功業與文章斯道非有二汝宦久秦中浮膺封圻寄仰沐聖主慈寵命九重責日夕爲汝祈冰淵愼惕勵譬諸構榱材斲小則恐敝又如任載車失誠則懼躓捫心五夜慚報答奚所自我聞經緯才持重戒

輕易勿以求煩苛勿以察猥細勿膠柱糾纏勿模稜附麗
端已勵清操儉德風下位大法而小廉積誠以去僞西土
民氣醇質樸鮮糜費豐鎬有遺音人文鬱炳蔚況逢郅治
隆鈞陶綜萬類閭閻守耕鑿儲畝士依媚大田歲屢豐多
遺秉滯穗鼓腹遍康衢擊缶樂酒餽民力久普存愛養在
大吏潤澤因時宜撙節善調劑古人樹聲名根柢性情地
一一踐履真實心貫實事曩蹟永不磨昔賢庶可跂千秋
照汗青今古合符契不負生平學不存溫飽志卓哉韓范
賢治績前史備事事規模之其乃克有濟上酬高厚恩下
爲家門庇我家祖德詒箕裘罔攸墜痛汝早失怙遺教幸
勿棄衰年逼桑榆垂老筋力瘁曳杖看飛雲目斷秦山翠
睡起日高春乾鵲噪新霽披衣覽鏡幽霜雪滿鬢髻惟餘

望汝心任大勤自悲書此遠寄汝汝宜日誦記勉旃矢弗渝用作官箴肄

就養秦中一路察訪政聲聞父老俱稱中丞之賢抵署喜賦三章

驂駢乍解路三千風物秦川慰眼前到處聽來人語好頻年豐樂使君賢

連朝話舊到更深不盡婁江望遠心莫怪老人添白髮兒童幾輩換鄉音

周遭竹嶼與花潭檻外雲光映翠嵐儘有瑣窗詩料在不須回首憶江南

靈巖山館夜坐

圓景下絕壁山館忽已暝石磴靜張琴雪泉清淪茗不知

夜已深月上青松頂

正月十二夜偶作

銀缸暗畫堂坐數漏偏長雁影半牆月雞聲萬瓦霜夜吟
多遣興春夢不離鄉庭下微風起梅花入暮香

小園卽事

小園半畝寄西城每到春深信有情花裊簾櫳晴放燕柳
邊樓閣曉聞鶯漢書舊讀文猶熟晉帖初臨手尙生自笑
爭心忘未盡閒招鄰女對棋枰

鄧尉探梅

光福寺前日欲曛上陽村外望細縕千林萬壑浩無際不
辨湖光與白雲

春殘

日知錄卷之二十一
三五
梨几熏鑪百衲琴綠陰門巷晝沈沈春來小苑無人埽花
落窗前一寸深

雨夜

向晚花冥冥獨坐理琴譜一縷茶煙生疏簾散春雨

夏日戲作六言截句

撥火鑪香颺來卷簾梁燕飛去吳門六月猶寒雨在江南
何處

靜逸園秋日閒居

園本名薛蕢爲王麟洲大司寇別墅園中假山係張南垣遺製

勝跡招城市幽居得小園吾生澹相寄往事漫追論人憶
烏衣舊名憐香草存祇今耽靜逸秋景滿邱樊

字摹王內史詩愛鄭都官石色青書幌花陰冷畫闌池魚
一二寸庭竹兩三竿於此端居好身閒夢亦安

地迴人稀到風清暑不侵竹簾香細細桐閣綠悄悄隱几時看畫安絃靜譜琴夜涼明月上掃石坐深林

磴小花枝密廊深書舍藏有時翻祕帙隨意坐匡牀詩校前春橐鑑凝隔夜香庭前蹲石丈親見厯滄桑

張絢霄字霞城畢沅側室有四福堂橐

敬和靈巖山人惜春詞

連日幾無痛定時撩人事事總堪思膽瓶石竹花纔放猶憶生前手插枝

畫廊小步又逡巡驀地傷心憶昨辰鸚鵡不知人已逝隔簾猶是喚迎春

朝開妝鏡夜熏衣除爾安排事總非正是躊躇難料理新詞怕聽惜分飛

周月尊字漪香長洲人畢沅側室

袁簡齋曰漪香酷嗜文墨詠水仙云影疑浮夜月香不隔簾櫳偶成云家如夜月圓時少人似秋雲散處多

憶梅和韻

迢遞南枝悵水陰每逢春到寄情深月牽晚晚三更夢玉
斲玲瓏一串心雪海香留應作國雲街手植定成林他年
繡佛飯清梵藉爾孤芳伴淨音

青門柳枝詞

春來折盡更逢春幾見長條拂地新灞岸年年綰離別今
年不見去年人

遠峯涵碧水拖藍纔放新青春已三無那縈愁復縈恨曉
風殘月憶江南

才下誰嗟行路難紅塵掃盡綠枝殘天涯半是傷春客飄
泊煩他青眼看

畢慧字智珠號蓮汀鎮洋人沅女陳觀光室有遠香閣
詩草

憶梅和韻

記得孤山竹外陰橫斜水畔徑深深南枝夢斷空明月東
閣詩成見素心臘雪乍添新豔采春風仍到故園林冷香
得句愁難和合付金徽託遠音

青門柳枝詞

風際游絲澹蕩春畫橋低亞柳條新流鶯百轉清陰裏喚
起芳郊拾翠人

晴波倒映漾柔藍最好風光三月三羌管一聲縈別恨慢

教吹徹望江南

不同桃李駐顏難一色長條春未殘簾外子規啼不住紛紛紅雨倚欄看

榆莢爭春春暗歸綠陰滿徑染苔衣嫩煙酥雨年年事莫趁東風作雪飛

李筠仙崇善人諸生劉可則室

詠竹

亭外猗猗碧幾竿清姿勁節耐霜寒舞風影作飛鸞勢嘯月音疑老鳳翰自是主人甘澹泊不勞童子報平安階前那有孫枝秀寫出淇園獨坐看

錢孟鈞字冠之號浣青武進人尙書諡文敏維城女巡道崔龍見室有浣青詩草鳴秋合籟集

洪北江曰錢孟鉞詩如

沙彌升座靈警異常

詩話浣青詩宗浣花青蓮故以浣青自號曼亭曾官
杭州浣青於湖山題詠爲多曼亭著述無存僅有題
辭五古及百字令詠牡丹詞一首附浣青集題辭有
云媿無秦嘉篇報瑤頻往復子婦莊素磐亦能詩

始皇塚

驪山高復高落日霾荒臺西風吹白道下見幽宮開秦政
昔亂紀刑殺如霆雷鯨吞六國盡聲色非仙才童女不復
還龍戰颺輪摧寄言鎬池君英武安在哉千人競謳唱運
石清渭隈築之崇三墳下銅泉水來黃金作天地日月爲
樽壘銀海停不流人膏燦無灰飛蠶三十箔一一紅玫瑰
知埋幾皓齒何論萬匠哀可憐閉衰草虎視斂寸坏雖令
地成市難買青陽回足使天下傾何待長城摧楚炬與收
火雨赭無遺煨寶玉不在土死增骸骨災徒聞古丈夫霞

舉登蓬萊

古別離

嗚咽清渭濱紛披灞橋柳今古傷別離揚鞭各揮手

漢通天臺銅人歌

武皇歲起雲陽宮高臺屹與雲漢通欲求真訣鍊顏色紫
瓊之露飛濛濛青霄不下兩皇子十二仙人一夜死文成
五利不及一少翁能使香魂望如水淒淒茂陵月玉盃埋
苦碧難問舍人壺空羨方朔戟當塗代漢逾百年銅人之
淚流作鉛移經灞水亦傷別迴頭立盡東關煙君不見古
今興廢皆陳跡金石有情悲過客化爲銅駝卧荆棘

中秋待月以平分秋色一輪滿分韻得色字

重簾燭暗露華白桂樹凝寒掩瑤魄爲恐人間感別離

輪不轉纖雲織幾家
弦管盼清輝何來匹練澄空碧影娥
池冷鏡奩塵天外徒橫秋一色
銀漢無聲不記年瓊樓有
夢空成夕迴頭容易參商隔
今日當筵須共惜越鳥南飛
未有期秦山西去猶爲客
願留光景十分滿莫使深杯等閒擲

蠹簡

欲悟神仙理何辭筆舌殘
消磨因久度辛苦在忘餐
三絕編猶在千迴誦未完
便教成缺略依舊悞儒冠

斷碑

野火焚猶在
淒池見宛然
數行銘瘞鶴
幾葉揭輕蟬
完損神難合
摩挲癖可傳
較他嗤沒字
片紙亦前賢

憶梅和韻

淡煙漠漠護重陰思入羅浮夢已深對月應憐清夜影懷
人空寄歲寒心雲橫渭北家千里春到江南雪一林誰向
天涯問消息好從孤管寫餘音

寒山無恙隔層陰一縷相思爲爾深夢後何人同載酒花
時有客獨關心飛來晴雪春留影相送前溪月在林官閣
吟成應寄興不教空谷誤登音

殘荷

一片秋心近水殊空庭爲惜雨聲枯曾含夕露衣同冷及
聽清歌夢已孤幾幹紛披隨敗箨半塘搖落並殘蒲薰風
不與留顏色翠佩江皋再見無

青門柳枝詞

渭城風物又經春嫩綠初齊客思新記向大隄和雨折泥

他青眼盼行人

花未飛綿葉翦藍風吹無力起眠三舊游最有難忘處一路依依近漢南

折贈誰家悵別難藏鴉時節絮初殘何當繫艇揚州郭一種青青雨後看

花落江潭客未歸輕陰漠漠拂簾衣那堪煙雨催春去深巷人家燕子飛

讀史偶成

讀史弗窮理泥古辭易謬炎漢四百年尺土皆封堠胡云當塗高正統反相授堂堂司馬公乃書亮入寇朱三亦繼唐此弊孰爲救青史不足憑挂一乃萬漏悲風噪磯岸空江瀉寒溜望帝魂不歸曉痕寄猿狄嗟無兩丹米不得紀

蜀后

三國志后妃傳缺蠅磯夫人陳壽索丁儀米兩船儀斬之遂不爲其父立傳故云

燕燕吟

燕燕復燕燕將雛畫梁畔玉樓朱戶燦如銀翩翩弄影梨花院春去煙雨中花落雲巢空螳蛸懸繡闥蟋蟀悲秋風
暄涼一轉燭滄海森叢木他時舞館金缸凝今日頽垣蔓
草綠謝公墩上牧兒耕華表柱頭野鷺啄逝水不可回春
暉去難續莫奏雍門琴剩有唐衢哭白楊風起烏夜啼燕
子還來問華屋

感秋

日月不我待秋風吹素顏江雲長帶雨海月自銜山靜夜
千碁急高空一雁還獨餘搖落意終日倚柴關

華清宮懷古

霓裳歌吹動華清小輦曾催花底行池上鴛鴦憐並宿天
邊牛女笑長生空悲此日金釵擘何事當時白練輕一曲
淋鈴傳夜雨壽王宮內月同明

潼關

潼關天險鬱嵯峨天外三峯俯大河六國笙歌明月在五
陵冠劍夕陽多時來傑士能捫蝨事去將軍竟倒戈終古
丸泥憑善守英雄成敗感如何

張子房祠

狙擊早銷秦帝膽借籌竟創漢家基空疑狀貌同雌伏始
信功名見獵遲帷幄總分黃石略雲山不負赤松期高踪
迥出韓彭外紫柏千秋護舊祠

代書三十韻寄弟婦循之

燕臺風日好，少小共嬋娟。綦組初爭侍，簾幃每互眠。安花
 矜學步，約翠喜齊肩。柳愛依人舞，桃看隔院妍。不知春事
 去，惟覺鬢華鮮。乍返長河櫂，同歌入越篇。湖山欣把袂，月
 露各傳箋。酒爲藏鉤覆，茶因賭釧煎。臨風調玉琯，倚竹整
 湘絃。坐羨連枝樹，行伴並蒂蓮。學詩尊李杜，點筆動雲煙。
 秋水芙蓉港，春風玳瑁筵。玫瑰團作餅，梔子刻爲鈿。窄袖
 鸚鵡翫，低鬟蕙並拳。清宵無爾我，密意總纏綿。歲月不相
 待，分飛各一天。明珠徒有贈，寶鏡惜空圓。已判差池影，眞
 成斷續緣。餘歡留客袂，新恨入征驪。汝復爲春草，吾幾作
 夜鶻。隨夫行蜀棧，攜子渡秦川。宦思涼如水，歸心靜似禪。
 柳花空作絮，榆莢不成錢。松竹留荒徑，蓴鱸憶舊船。漫言
 童僕飽，還望故人憐。刀尺霜前女，笙歌海上仙。暫時容夢

見異地各情牽楓助思親淚蟬催去國年天涯千嶂在隴
上一枝傳何日隨歸雁南雲帶影旋

莊素磐字少青武進人知府鈞女永濟崔景儼室有蒙
楚閣遺草

詩話少青未嫁時隨其父歷官山東五州凡所過名
勝及春秋佳日輒命爲詩紀事六七年中積篋中者
百首議論不似閨中語年十八歸崔從姑吟
詠詩境益進年二十三卒洪北江爲作壙志

新月

簾捲西風小院門玉階涼動近黃昏蛾眉一曲橫天半疑
是嫦娥指爪痕

王采薇初名薇玉字玉珍武進人知縣光燮四女陽湖
孫星衍室有長離閣集

洪北江曰王采薇詩如
斷綠零紅淒豔欲絕

詩話玉珍母夢月旁一星光彩熠熠或告曰此四女
星也欲手摘之條不見及生玉珍姿質清弱既長性
柔婉耽文史手不釋卷小楷精絕尤工吟詠繙道家
書時有出塵之思其父奇愛之年十九費季述於家
越三歲生女阿靈得疾卒年二十有四袁簡齋爲作
墓志稱其詩哀感頑豔丁常清逸阮文達題長離閣
詩卷云青鏡涼涼夜如水魂靈心香動殘紙病意多
從別後添吟懷已在生前死琉璃匣彩雲天好事
人間那得堅玉臺空有傷神句鏡裏宮花破不圓初
刊薇閣偶存一卷吳會英才集於雨粟樓詩後錄玉
珍詩名長離閣集其從子曙龔
廣合爲一編附治城遺集後

曉起效徐陵體

春鏡動春煙春林綠半天簾低壓枝卷窗迴對禽眠書帳
蠅彈紙琴牀風觸絃辭衾惜香在掃徑待花薦研墨汚羅
袖看魚落翠鈿誰云厭長日終是惜馳年

望夫石

妾顏初如花妾心已如石定情雙妍姿不忍君歸見衰色

妾顏將彫心不移妾身亦化君始知冰爲肌草爲鬢山頭
無人寄君信妾意淺君心深恐君復化填海禽海禽來銜
石方動不作巫雲入君夢

春眠曲

篁梢壓戶簾紋細空色湖光著山膩鶯眠樹杪弄垂絲蜨
上花鬚醉芳氣琉璃隔香香暗流薇帳夢醒聞輕鉤空闌
盡晝無人影日炙落紅蒿不收

夢起

夢醒空階望翠微幽苔染影上羅衣寒天細竹人孤倚斜
日空檐燕對飛碧嶺疊來鄉路斷玉梅枯盡舊顏非夜堂
疏磬疑禪寂冷水閒雲照合扉

有感

名香一縷當簾出故札千函向日開入夢已迷前度草返魂惟有去年梅

夢天

碧闌十二花無數桂葉低籠若青霧蕊宮誰遣別魂游只有青禽送來去波離扉薄不上關對語月姊瓊樓間銀河珊珊瀉聲小手弄白雲天下曉

舟過丹徒夜半與夫子登岸行三里許

幽行已三里村落半攤扉隻鳥時依樹孤螢不上衣月高人影小潮定櫓聲稀沿水星星火歸驚宿鷺飛

寄季述時客和州

空院題詩對碧莎華年作別歎蹉跎夢餘捲帳人疑在書去尋愁語轉多曉岫入雲飛斷雁夜鐙照雨落殘蛾空江

無復憐才客此夕租船憶嘯歌

蔣墅舟次和季述下第有作

一夕霜花溼鬢青
湍聲出渚棹初停
病中龍具和衣泣
愁裏魚簫帶夢聽
隔浦葉多飛似鳥
入林鐙小遶於星
從君湖海幽尋志
何日浮家去杳冥

春夕

已罷讐書怨夕遙
更間疎竹度鄰簫
靈瓏鳥語驚簾押
寂寞冥香絲繞畫
綃一院露光團
作雨四山花影下
如潮傷離不爲何
郎句病久東陽自損腰

何玉瑛字梅鄰侯官人袁州知府鄭鵬程母有疏影軒

遺草

詩話梅鄰好讀史旁通繪事奕其精音律得佳竹裁爲小洞簫吹之合律少隨兄番禺縣丞官舍兄奉檄

解館滇南道卒梅鄰恐傷母心戒家人祿之跪求舅
氏歸其兄喪事見於詩適鄭氏後值家中落乃盡謝
藝事躬親操作以許魯齋之說勸其夫寄遠詩有云
儒者在鏡臺前授以書稍長從師歸率挑鐙爲講經史
晨在鏡臺前授以書稍長從師歸率挑鐙爲講經史
有助見詩四首長子鵬程後官袁州知府刊遺藁於
任所覃溪題云國史箴得失風自閨門始卽以名媛
詩不外無邪旨莊姜共姜篇秉心貞義矢下聲許味
思亦各關倫紀何至晚唐什光威瓊綺靡徒涉景事
工膏論詩言砥正變所以分興觀化攸啟閭中何恭
人五言首詠史繼以勸兒作寄舅兼懷姊既殊香奩
體何嘗玉臺振弗取巧縛評或慙風雅企寄語採風
斯編視

詠史

覆巢無完卵肉味安賴知此語達而痛乃出七齡兒間變
奕不動臨刑甘如飴具此浩然氣巾幗勝鬚眉假令得永
年豈數女中師痛哉孔文舉身後無子遺裂眚數阿瞞慘
戮一何悲此女甘荼毒空贖蔡文姬

王霸厲清操胡慙令狐友兒女俗情牽聶喟其婦當其
偃卧時理欲交戰久室謫儻有詞北門恐失守雖貴豈如
高一語醒灌首古來孟光賢梁鴻甘杵臼似此灌園終毋
乃閨中誘惜哉逸姓名高風真不朽

口占勸兒

殖學精於勤取法貴乎上功無一息寬志欲千古抗臨渴
而掘井及泉烏可望置身賢豪間男兒何多讓

卽景

樹杪點霏霏蹢躅燕子飛數聲嗁鳥寂一縷篆煙微竹筍
掀泥出梨花帶雨肥眼前饒好景得句愧珠璣

盼竹友舅氏滇中信

一諾重千金招魂瘴嶺陰老人雖健飯闌夢總關心義膽

神靈護征途雨雪侵此時回棹未旦晚盼鴻音

松濤

輪囷老榦鬱千尋萬籟銷沈聽遠音風雨五更驚鶴夢波
濤一院起龍吟簷前水訝傾銀漢空外聲還答暮碁雨滴
芭蕉風戛竹一般幽韻譜瑤琴

截竹爲小洞簫吹之合律喜而賦此

琴書餘暇學吹簫揀得良材製造工羨汝瘦生偏直節可
人爽籟本虛中松間滴瀝蕭疏雨空外悠揚婀娜風清響
原來需小鳳鏡臺長伴當樓桐

寄遠

暫同蠓屈亦何悲風雨終看破壁時儒者治生原急務古
人隨地有師資關心眠食期加飯得意溪山乞好詩來往

鯉魚煩尺素流光彈指數歸期

游小蓬萊山

滿徑白雲冷數株風樹斜此中有仙女願與乞胡麻

埽梅

梅花片片白無瑕吹落階前雪點斜未忍和苔黏屐迹月明攜帚埽瑤華

閨中讀書

文采翩翩亦未宜大家遺訓恰須知古來列女非無傳不在多聞在取資

劉希班長治人諸生希顏希曾妹李續庚聘室

詩話希班字李未嫁年十五聞李歿誓身殉母以守節勵之越日賦慰母詩絕粒卒

慰母

大義千年重浮生一粒輕留見貞節在兒死勝見生

方芬字采芝大興人維翰女有綺雲閣詩草

詩話采芝年十一舟行阻風有江
間白浪青山動之句人稱其慧

晚行過昭山

長沙西去水驛長季冬不覺江風涼昭山對面挹秀色龍
口飛渡波茫茫斜陽縹緲入林去岸風吹送梅花香山頭
古寺鳴鐘起噲咍鏜鞳和鳴榔松聲撼撼復入耳須臾明
月浮清光眼前景物動吟興千態萬變非尋常

阻風敬步伯父原韻

大風徹夜舞狂瀾正是扁舟繫纜時兩岸霜楓榮遠夢一
帆寒雨亂鄉思江間白浪青山動天外黃雲畫角吹寄語
石尤須早息揚舲穩渡莫教遲

南行見竹

山前忽見千竿竹高影猗猗最可人自別此君雙眼俗相逢爲我滌征塵

思柏滿洲旗人侍郎永壽室有合存詩鈔

新秋

氣爽涼初至更闌暑漸清秋窗聞雁早梧葉墮風輕野靜蛩相語天高月自明煩蒸從此滌披卷愜幽情

七夕

渺渺天河風浪多一年一會尙蹉跎人間更有黃泉別鵲去橋空可奈何

廖雲錦字織雲青浦人知縣景文女有仙霞閣詩草

畫雙松歌

畫鱗難畫龍畫樹難畫松龍乃神物善變化幾人曾見破
壁來虛空松之視龍勢不異離奇蟠曲難形容誰摹此圖
真妙手雙松矯矯如雙龍爪破白日擎雲雨咫尺庭陰青
萬重祖枝孫榦相追逐生怕茅屋搖秋風竭來移挂傍几
榻猛然驚醒午夢濃繞階而走心膽落滿庭雲氣生窗櫺
日暮蕭齋兀愁坐夜夢已到扶桑東

喜高平表姝至

爾我襟期喜共知笑言頻到漏殘時開匳會看將完繡剪
燭閒敲未定詩金鴨灰深香篆細晶簾風定落花遲晚來
又恐輕言別月底鐙前繫夢思

張芬字紫蘩號月樓吳縣人舉人曾彙女州同夏清河
室有兩面樓偶存藥

詞話月樓風乘慧業從常熟許冰壺夫人游冰壺門徒數十月樓與其姊桂森所最契賞自清溪結詩社月樓以詩相質每分題聯詠儕輩咸推服又偕寂居碧雲諸子參禪論學故語多神悟

端午村居

荒村無競渡極目野煙昏欲奠盈樽酒空悲繞膝恩五絲難續命一賦獨招魂何以酬佳節菖蒲綠映門

秋草

一片淒迷亂鬼燐斷腸休問昔如茵王孫已破天涯夢游女還傷陌上春野岸帶煙昏曉月暗蛩和雨絮愁人誰尋幽徑寒林下弔古空悲蕭瑟辰

挽燕

越海還山願已違隔簾嬌語是耶非好憑釵影傳遺照獨伴花魂葬石磯一壘香泥閒畫棟幾宵春夢別烏衣可憐

吟客斜陽裏淚墨盈箋招不歸

七夕詠

晚涼無復舊時妝欲罷金梭益自傷莫笑離多偏易別久
時離別作尋常

和皎如沈妹見懷元韻

香消紅袖晚妝殘月下懷人倚曲欄想得吟情幽絕處滿
庭風露玉釵寒

秋夜懷寂居禪友

樓空秋思迴憑眺獨蕭森月鏡開靈覺霜鐘警道心可憐
黃葉落無奈白雲深想得安禪處天花正滿林

白楊花和碧雲王妹作

柳絮飛來風片斜牽人魂夢散梨花淡煙明月迷隋苑玉

燕珠簾憶謝家鶯舌好翻新樂府蛾眉消卻舊韶華綿綿
欲斷渾難斷萬縷離情怨暮笳

沈縷字蕙孫號散花女史吳縣人教授起鳳女諸生林
衍湖室有繡餘集翡翠樓詩文集浣沙詞

讀騷

江水流不息落日秋風勁漁父誠知言千載悲獨醒瓊佩
終不渝芬芳自輝映微詞莫能顯感物託其性風詩固一
變聲哀義彌正願鼓湘靈瑟高歌發清聽

田家雜興和林屋山人作

一夜響春泉微雨溼茅屋驅犢出門去平疇靄如沐禾黍
自懷新生意何或或昨停枯槔聲無人雀爭啄陽和共歆
羨遠風轉溼煥黽勉事芸耜有年從此卜

向晚羣動息杖策來東菑鄰舍多好懷往還無厭時平生
守直道詎假智慮爲辭拙意彌真禮疏情不移古風轉愴
樸徒爲蕓俗嗤

東風昨夜來不知草木長曉起荷鋤出眺此平原廣牆頭
桑葉白屋後春泉響節序時迭更風光正駘蕩野老散雞
豚相逢時倚杖

穹窒競熏鼠歲晚百務閒踪跡遠城市陶然西疇間新酒
可介壽園蔬供夕餐不惜三時勤獲此終歲安貧賤瘁筋
力貌苦心亦歡衣食幸自周苟免饑與寒

楊太真華清宮上馬圖

野鹿銜花宮禁悄沈香侍宴歸來早念奴報道宿醒消果
下名駒鞚初好春風扶困上雕鞍娉婷仙骨何珊珊杏子

裙遮金埒暖鴛紋袖籠玉鞭寒香塵暗逐飛花外半響鸞
鈴搖月佩邀得君王帶笑看生憐冠絕風流隊那知鐵騎
起漁陽鞀鼓驚殘歌舞場無奈六軍皆不發馬前宛轉殉
紅妝

方正學畫竹讚心齋先生家藏

方先生性正直靖國難躬戮力族不辭死何惜剖吾心剖
吾舌身可烹心難折炳今古耀史冊展畫竹淚痕溼兩三
竿五六尺挺貞姿效貞節疏喬枝翻密葉歲寒松同春柏
起英風淩霜雪顧此君人悲切

獨夜聞笛懷清溪伯姊

秋色淡如斯誰家玉笛吹一聲人靜後千里月明時莫辨
關山曲空悲楊柳枝秋風如可託爲我寄相思

阻風黃浦和孟韓韻

帆影落波光迢迢水一方潮聲飛雨白風色挾沙黃海月生蓬島江蘼裏楚裝騷人無限意高詠獨蒼茫

秋寺和碧岑姊韻

秋寺寒煙溼支筇望不迷石林殘雨響樵徑亂雲低落葉埋人跡疏鐘送馬蹏我來參大乘斜日下招提

采蓮曲同婉兮姊作

紅蕖十里曉風涼露滴儂家翠袖香橋畔盈盈雙髻女隔溪相喚渡橫塘

小立新涼掠鬢絲畫樓吹罷玉參差紅衣墮處無人見月白風清子夜時

題趙承旨畫蘭

可憐王者香零落顚顚瀟湘第一枝空向新朝誇畫筆難
爲騷客寫愁思故宮落日悲荆棘周道秋風怨黍離何處
託根猶故土淡煙細雨伴江蘼

書中乾蝴蝶

此身未肯沒蓬蒿翰墨鑽研志趣高早並蟲魚登爾推自
尋香草到離騷憐他金粉耽綉帙寫爾芳魂託綵毫一卷
南華憑夢醒始知栩栩亦徒勞

題二喬觀兵書圖

舳艫焚盡仗東風應借奇謀閨閣中曾把韜鈴問夫婿誰
言兒女不英雄陰符偷讀妨描黛繡帙雙開見唾絨一十
三篇勞指授蠟磯餘烈本吳宮

張因字淨因江夏人舉人黃文暘室有埽垢山房唱隨

集

詩話淨因幼讀書兼工繪事夜觀恆星皆能指而名之年二十五歸于黃事舅姑以孝聞舅姑歿寫偕隱圖以寄意吳梅村祭酒之孫貧餓於竹西路黃割宅居之其子女失母淨因撫之至成立長官有慕淨因名求見其詩者閉門謝曰本不識字也

送秋平赴試

落葉滿階砌西風鳴紙窗曉起促行色相對兩茫茫雖無久離別中心自感傷何如百里婦屢屨炊高糧朝餐渾未備枵腹赴征航細雨溼行袂涼飈歛短裝飢鴻唳天表寒鷺下林塘行李太單薄何以禦嚴霜執手斯須立有淚已盈眶丈夫富經術憂患天所嘗行矣勿復顧努力事明揚禿筆吐異彩古墨發新香不挾兔園冊惟憑胸所藏幸逢冰作鑑慎勿輕文章

夏夜

涼風送遠鐘露溼桐陰薄斜月影沈西卧見榆花落

題河鯉登龍門圖

儻騰斗室搖長風壁間錦鱗思成龍揚波鼓鬣河當中頭
角未具鱗甲雄龍門萬仞摩蒼穹縱生入翼層雲封欲跳
不跳喧豐隆我見爲之心忡忡鱗兮鱗兮開鴻濛超然一
躍如飛虹雷火燒尾五雲從萬里青霄路忽通

春日湖上偶題

湖上春光麗風微日正餘蜨隨芳草集柳近畫樓多鶯轉
疑絲竹花香散綺羅誰能攄彩筆寫出好煙波

衰柳

搖落無心問化工秋山秋水怨何窮黃眉慘淡愁逢雨青

眼飄零泣向風牕得寒蟬鳴古岸更無殘月照離宮斷魂
草趁羌人管又逐清商入遠空

詠庭前綠梅

半放猶含意態殊迷離香夢仗春扶月明偶揭湘簾看不
是紅兒是綠珠

疑花疑葉總難分晴色梢頭翦碧雲最是晚來易惆悵數
枝無語立斜曛

題江碧岑女史龍女抱經圖

珠簾不捲坐焚香小字維摩病合當要識多才天亦忌蓮
臺只合拜醫王

已歸淨土結蓮胎更向塵寰見異才讀盡儒書千萬卷又
從佛座授經來

朱滿娘字月上烏程人厲鶚側室

吳毅父曰月上鶚管之外喜近筆硯從彼君授唐人
絕句二百餘篇頗識其意故微君悼亡詩有擲管自
稱詩弟子語初微君客湖州邂逅得之遂載以歸繪
碧湖雙槳圖一時豔之題者甚眾杭堇浦太史二絕
云薛家鏡子照梳鬟黛挽何曾盡日閒夫壻愛誇新
樣好畫眉只學小敷山青蘆結響正西風一舸浮來
是聞紅手把鳳蕭羅袂薄蘋香吹動月
明中月上海喜誦之年二十四而卒
題自畫紅梅

一枝紅綻傍牆陰疑是絳衣仙子臨莫說桃花偏命薄多
緣霜雪未能禁

方婉儀號白蓮居士歙縣人江都羅聘室有學陸集白
蓮半格詩

詩話白蓮幼承家學工半格詩及續於羅棄而不爲
觀雨峯畫寒天梅竹頗通逸趣杭堇浦題其詩云每
疑詠絮無全什又怪簪花少畫名親見夫人擅三絕
居然不飾一書生欲賦梅花大欠詩何圖林下有風

期不知雪腕親濡筆瘦影疎香寫幾枝爭業修從九
品臺入功德水養根莖與參妙法蓮花義洽有清涼
世界開瘦格烏絲小筆森更欽新製唱仙音若教唐
韻開軒寫一字應輸一餅金詩參三昧畫通神玉雪
羅郎迴絕塵不是月泉吟
社客如何修到此肩人

記得

記得當時攏髻年春宵坐月百花前謝家小妹王家姊手
弄窺窗白玉錢

題馬守貞雙鉤蘭花卷

楚畹幽蘭冠眾芳雙鉤畫法異尋常國香流落空留賞太
息金陵馬四娘

期諸姊姒茶話

舊家門巷草新生歲歲春風不世情已辦月團三百片好
來同聽煮茶聲

生日偶吟

平簾疎簾小閣晴朝來池畔最關情
清清不染淤泥水我與荷花同日生

梅摹魏國夫人畫字做楊家妹子書
一盞眞茶消永晝玉漿犀液較何如

次韻題明妃圖

塚畔青青草色稠芳名史冊著千秋
畫師若把黃金囑老守長門到白頭

吳蕙字蘭質吳江人兆騫女孫諸生費定烈室有庾樓吟

歸來草堂有感

自註時兄弟俱亡
惟存寡嫂孤姪

寂寞空庭冷淒涼舊迹存乾坤埋傲骨風雨弔游魂翠色

滋階草苔痕封樹根秋風肅戶牖獨立向誰論

秋日寄懷蓼洲弟

一夜砧聲楓樹凋離亭風雨欲魂消便鴻南向應無數好
寄新詩慰寂寥

屠蒞佩字瑤芳秀水人孫渭璜室有咽露吟鈿匳遺詠

觀沈氏諸姬演劇

梨園喜見屬紅妝三五娉婷出洞房檀口鶯聲歌細細柳
枝蝶態舞將將冠簪雅步參軍度粉墨塗顏儻父行底事
酒闌人未散月明照徹錦雲裳

佟素衡瀋陽人國器文

勉兒勤學

庭槐漸覺影婆娑歲月催人老奈何晝永爾宜勤課讀夜

深余亦愛吟哦從來自恃閒偏淺到處心虛識愈多美玉
碌磨終作器分陰須惜莫蹉跎

施坤字資生儀封人張鉅卿室有過雲吟

詠古

仗劍出昭關投吳秉節鉞一出敗荆師再起復全越英風
震五湖霸圖日突兀奈何長寇讐忠言不能入君王賜屬
鏤臣罪當誅滅鳴夷江水寒天地泣壯烈轉眼問吳宮繁
華久歇絕青青館娃柳冷冷蘇臺月長嘯海天空涼飈振
林樾

詠殘牡丹

東風吹老碧桃枝偏爾能開傾國姿垂首似含亭北恨折
腰如怨馬嵬時殘香尙足驚凡卉剩粉猶堪入品題寄語

東君好珍重莫教風雨葬西施

商可字長白會稽人盤長女同縣王氏聘室有曇花一

現集

商寶意曰可幼曉毛詩文義漸獵羣書居士課之有
四始皆成誦時還讀我詩之語其後取急歸里江海
淹留女乃自求諸古單詞隻句斐然可觀然深自矜
胸秘不示人也猶憶勝國全盛時培養士林旁敷香
閣吾家蒙幸公子告居鄉一時門第園林之盛比諸
鳴珂碎錦綠墊雕橋不特兩孝入慈爭奇競爽而淑
媛多才如媚生嗣音雲衣諸祖姑皆綺霧經雲方駕
班蔡珠囊瑤軸傳播人間商氏閨秀故老皆能道之
而今不可復覩矣嗟乎使女得天假之年所就當不
止此而香哩玉座荏苒三秋居士既爲女痛復歎先
澤清芬之繼續蓋若斯之難也女舉止端麗有林
下風詩亦俊逸敷腴無怨綺傷羅刻翠剪紅之態
自課

鄙齷初授經傳家惟四始和平兼溫厚頗識風人旨貌遺
留乃神理合變其體方員無定形勿學塗印璽作爲冰雪

詞獨賞無人喜何用黃金鑊與世刮眸子

題高且園指畫魏國夫人夜游圖追次坡翁韻

阿瞞西幸乘青驄魚陽鼙鼓來猪龍當時釀禍由妃子五
家甲第連離宮八姨婉嬙如春柳紫絲雙鞦韆纖纖手璧月
多情照麗人鈿釵已化長安塵畫師解得娥眉意不帶南
都粉黛痕薰天貴戚原非古西市門深芳草路寶炬香車
莫近前丞相耿耿氣如虎

垂簾

柔綠陰無際垂簾晝似年鶯聲催午課花氣擁春眠向母
尋眉譜隨兄治硯田潛心看內則鈔得兩三篇

憶鏡湖和大人韻

蝦籠蟹簍柳陰邊雙槳淩波跳白船著色畫圖忘不得紅

東坡全集卷之二十一
霞一抹晚晴天

鬪蟋蟀

誰教嘍喏兩爭雄
白帝餘威到草蟲
可惜旌旗兼壁壘
指揮都是小兒童

秋柳

多情大垂手
婀娜早春時
忽漫傷憔悴
還能管別離
畫輪勞悵望
衰草共愁思
滿目金城色
攀條始得知

題畫

雲鬢斜分玉指尖
妝成小立影廉纖
癡情細囑紅襟燕
銜取春愁出繡簾

霧縠冰紈稱體裁
春蘭秋菊一時開
芝田館外盈盈水
蕩盡人間八斗才

鞏年兆佳氏滿洲旗人有實情草

厭酒

愁入肝腸賴酒除何如遣悶有詩書聖賢無限安心法酌
盡醇醪恐不如

題邵飛飛詩卷

飛飛閩人所遇非偶
有斷腸詩三十首

多病惜花花黯然才人幽恨到蠻牋愁來畢竟憎詩卷風
雨青山叫杜鵑

牟氏黃巖人賢女夏濬室

立秋雷雨初晴與外共限韻

一葉驚秋雨殷雷欲住時寒蛩猶未覺促織已先知翦燭
同清話合臺各逞思微風生夜月雁影落芳池

秋樓遠眺

秋風遲我一登樓檻外山楓錦色稠
一片白雲歸雁急半林黃葉暮蟬收

鄭鏡蓉字玉臺建安人雍正癸卯進士
兗州知府方坤長女閭縣陳道敷室有
垂露齋聯吟集

詩話荔鄉九女皆工吟詠玉臺居長隨任
兗州時日有詩課花萼唱酬後堂稱盛

秋雨用蘇岐亭韻

更漏響沈沈銅壺滴金汁遣興與裁詩
含毫紙欲涇似云石燕飛哀祈幸一得
潭底起乖龍如奉律令急蛙鼓亦齊鳴
嗟喋亂鵝鴨陣陣勢傾盆縷縷煙垂幕
離披蜀葵黃狼藉鷄冠赤淨洗六街塵
水碧復沙白茅屋頓涼生微香吹衣幘
一雨一犁金貧民免啜泣從此慶豐年
禾黍盈無缺原野景色新能遣悲秋客
且暫解焦勞小榻呼觴集

夏日鈔書小窗如炙念家嚴遠出捕蝗率彼曠野炎
蒸百倍因用家嚴送有鄰弟返里原韻示諸妹

煩暑正流金長日當季夏姊妹小窗閒時作喃喃話雙丸
去如梭倏過端陽假楸枰已嬾彈對食卻盃罍石鼎響如
潮茶煙看繞舍榴火復薇花景物遞相迓蛙鼓不停聲令
人幾驚咤白汗如雨揮黃沙將人射雖罷火傘張那得清
涼夜太守同民憂詎有案牘暇昔歲厄陽侯汜濫吁可怕
今幸茁其苗轉眼納禾稼胡天不悔禍鳩鵲未蒙赦蟲豸
迭爲災撲面火雲下大地真如爐短後衣難卸返署未浹
旬又促星言駕雖滅旋復興吳越若爭霸宦海嗟茫茫何
時守桑柘爾輩尙童心嬉笑還怒罵我心耿耿然好懷那
得借因思官閣清松蘿高插架更有秋水篇千載人膾炙

早晚涼信來煩憂暫可謝能息數朝間好把歸鞍跨蛩聲
荒砌吟螢光腐草化掃地更焚香襟期古人亞此事難預
期欲言先嘔啞八閨未云遙時家大人遠隔如滙灞蟲口
有餘糧俗云蝗蟲口內有餘糧 諺語堪慰藉薪米慶豐年無憂珠桂
價

夏曉

綠樹環庭外荷含晨露深軒窗不受暑水竹自成陰隙月
窺殘夢疎星動曉禽碧樹風遠送涼氣逼衣衾

新秋

淒淒砌裏有蟲吟漏盡聲聲韻轉沈人入夢時初過雁月
當圓處正聞砧風微菡萏浮平沼雨霽梧桐落遠林此夜
幽閨偏耿耿悲秋爲感楚騷心

鄭雲蔭字綠苔方坤次女福清嚴應渠室

夏夜乘涼限韻

乘涼憑畫闌螢飛頻仰視解渴何所需冰盤浸瓜李便敵
曹公梅差亞陳家紫星斗掛疎林柳枝拂棐几忽然起驚
風亂颭芙蓉水明月皎皎光直照深潭底何處碧荷香沁
入金尊裏

鄭青蘋字花汀方坤三女閩縣翁振綱室

賦得綠樹陰濃夏日長

學飛乳燕遶迴廊出水芙蓉冉冉香曲院花凝晨露潤小
窗人耐晚風涼鶯梭亂織千條柳蛙吹時喧半畝塘欹枕
橫斜書數卷了將清課日初長

鄭金鑾字殿仙方坤四女閩縣林守良室

蓬萊閣觀海和韻

高閣層巒上滄溟那有垠射工迎落日颺母類奔雲縹緲
來三島高寒到十分登臨餘感慨漁笛不堪聞

梨花限韻

三月園林草徑荒一枝晴雪簇東牆冰姿差後寒花發縞
素渾如貧女妝豔惹夜蟾光處白淚含春雨冷時香空庭
寂寞無人迹引得游蜂陣陣忙

蔣佩玉字湘紋長洲人兵部侍郎元益女鎮洋諸生王
洲室有湘紋吟草

秋夜

銀魄動秋光淡淡雲輕護夜靜獨憑欄徘徊時坦步清露
溼羅衣商飈來遠樹河漢碧迢迢微茫星斗布叢桂影婆

娑廣寒疑有路

籬菊呈家大人

秋光何澹蕩黃菊滿籬東瘦影安排靜幽香點綴工霜華
延令色晚節傲清風獨有陶彭澤吟詩逸興同

題畫

幾點青山杳靄中柴門引水帶煙籠結廬誰在幽篁裏半
貯朝霞半晚風

查女海甯人嗣庭女

詩話嗣庭遣戍其女亦
徙邊塞有題驛壁詩

題驛壁

薄命飛花水上游翠蛾雙鎖對沙鷗塞垣草沒三韓路野
戍風淒六月秋渤海頻流思母淚連山不斷背鄉愁傷心

漫譜琵琶怨羅袖香消土滿頭

何桂枝桂林人

詩話桂枝幼失怙恃其母族鬻於潯梧將軍門下客
客揚州人也居爲奇貨得多金以歸浙人某給諫爲
妾不一年卒其悲命詩旣自哀亦
以哀揚之俗老嫗都解無害俚言

悲命詩

六月六夜雨聲急有女不眠悲思集側耳東方人睡酣倚
牀低首羅巾溼有恨無可伸有語向誰陳坐對中宵雨長
嗟薄命身我本廣西城裏女此處爺孃非我親暗想八九
年前事寸心耿耿獨傷神憶我六七歲父母雙拋棄寄養
向貧親貧親無好意潯梧將軍門下客一時假虎烈威勢
與得金錢知幾何甘心鬻我作人婢爾時幼小只從他薄
命飄零可若何當年攜到揚州地山程水程萬里多揚州

一入主翁宅年復一年誰愛惜朝捧茶飯暮捧湯寒缺衣
裳飢缺食主翁有時稍見憐主母鞭箠那禁得忽然年來
情意改當作親生女兒待許我呼爺與呼孃梳頭裏足勤
勞倍不知奸計險於坑漫道厚恩深似海簫管琵琶學已
終牙牌雙陸亦教通纔延李姐傳歌曲又向張姑習繡工
事事求全勤督責朝謀夜議誰能測春來春去時忽忽道
我長大好顏色嫁得富翁貴公子終身享用無盡極昨朝
客到敝華堂逼我堂前見客忙不識誰家輕薄子周身上
下細端相但見爺孃喜滿面我正無顏歸繡房驚猜不敢
問自知徒自恨耳聞堂上言贏得心中悶方知堂上賓乃
是浙中人工科給事官名重六十無兒娶妾新豈是尋常
行禮節只聞次第講金銀怪殺爺孃心慘絕千金百金爭

未歇我生時日我不知朦朧造作與人說初五聘定初七
嫁卻道行程圖快捷可憐我貌空如花可憐我命真如葉
今日人家呼作兒來日人家呼作妾以此傷心怨復嗟夜
深掩涕肝腸裂蚤知粉面換黃金悔不當年墮江月已矣
哉且莫哀不見揚州舊風俗親生兒女嫁天涯天涯復海
角骨肉之間豺虎惡我復何須淚零落淚零落情未休長
江之水無西流風俗不改古人愁寄語紅顏綠髮閨中女
來生誓莫生揚州

董文字學舒闔中人焦士宏室

書感

機杼聲中絡緯鳴未亡人已久忘情玉樓赴召今何在不
問三生問再生

徐德音字淑則錢塘人漕運總督諡清獻旭齡女中書

許迎年室同知佩璜母有潔淨軒詩集

沈歸愚曰徐太夫人爲清獻公季女少歲研討典籍誦揚清芬歸許發爲詩歌更迭唱和泊稱未亡持家政教二子所值

彌艱詩格彌上

白紵歌

羲和六轡回蒼龍長紅小白紛作叢纖枝綽約隨流風翩翩冶態如驚鴻一寸眉峰暈春碧酒潮欲上蓮腮赤熱心擬化百枝燈長倚君王照瑤席

題大癡老人山水圖

听夕畫水兼畫山淋漓元氣在筆端此圖神妙信傑作誰欺抗手惟荆關連雲欲接富春嶺鼓擢直溯桐君灘晚飯雕胡然楚竹路轉山腰見茅屋日冠山衣爾何人想見土

風尚純樸自笑頻年車歷鹿子舍棲遲就微祿吾家舊在
湖山澳別來幾度春山綠曷不言歸種杞菊晴窗展畫三
摩挲移情如奏成連曲

題投筆圖

豈薄雕蟲技翻思汗馬功生當封定遠夢合笑文通聖代
烽煙靜儒生意氣雄百年同一擲感慨畫圖中

養疴雜詠

盡日鉤簾坐風光亦復佳鳥棲雲護竹人靜月橫階對酒
忘羈旅繙書遣老懷時時學吳詠自擊隱居釵

三月望日樓居火後示大兒佩璜

高樓一炬委荒蕪補屋何從更買珠釀酒已無田種秫打
門猶有吏催租晝操薪桂慵拈筆夜對缸花學辟蠱盡付

鬱攸無長物，舟居陸處總艱虞。

答陳竹町

曾課嵇男住歲餘，簡編勤誦髮慵梳。偶緣紅藥爲佳壻，更戀蘋花卻聘書。老去稻梁謀野鶴，才高滄海掣鯨魚。華亭同媿霑塵土，願借春風一掃除。

出都留別林亞清夫人

前身風格是林逋，築室仍依西子湖。班左妍詞才獨妙，郝鍾懿範世應無。掃除鉛粉留真韻，點染溪山入畫圖。卻憶當年同里閭，相尋翻似隔蓬壺。

元冥飛轂歲將終，去住無端任轉蓬。未易相逢輕作別，預思後會儻能同。驚飈眯目邊沙白，衰草黏天獵火紅。長路關山如見憶，詩篇莫惜寄郵筒。

出塞

六奇枉說漢謀臣後此和戎是婦人能
使邊庭無牧馬蛾眉也合畫麒麟

湖上行

芳隄載酒恣遨游湖上湧作青螺浮
桃蹊李蹊花零落奇豔惟留紅芍藥
暖風遲日倍宜人夾衣初試纖羅薄
松風吹袂聲泠然白舫閒消半篆煙
紫筴釵頭分建茗青蠶蟹眼淪山泉
酒酣日晏清吟歇懷古無端意飄忽
憑高更指鳳凰山蔓草遙連宋宮闕

試劍石

石上痕如切純鉤性最剛陽山飢渴
日何不試夷光

韓氏自署端靜閒人漢軍旗人錦女
蒙古乾隆庚子進

士國子監祭酒蒙烏吉法式善母有帶綠草堂遺詩

詩話端靜五歲喜讀朱五子書十三通經史喜覽古

今忠臣烈女事又能記識碑官小說神仙鬼怪偶一

論說可喜可愕聞者靡不感奮傾倒見時帆所爲行

賦又時帆跋遺詩云端靜聞人者先太夫人晚年自

署也太夫人工韻語顧有所作視不示人投稟古錢

中值朔望輒引火焚化日水流花放迹象奚存月

白風清光景斯在聞之者以爲見道語逮太夫人逝

竟不獲留隻字茲僅就善夙所誦習者鏤版以存又

云先太夫人心性和平出語清婉近體五言如家貧

秋覺早樹缺月宜多焚香忘拜佛看畫勝游山讀書

合深夜與藥及中年鑑昏香忘拜佛看畫勝游山讀書

無蟬響空塘有鷺飛雪緊鴉棲樹風高吹門棗紅

高樹日竹籬破霜飛荷香抱屋楊柳綠隨溪池風

吹草溼春月入簾虛挑花紅抱郭松葉綠圍山秋在

蕪葭外詩成風雨時七言如酒後看花多及晚風前馬

新雨馬蹏香習字最宜新雨後看花多及晚風前馬

齒菜香秋雨地雞冠花豔晚霞天庭草綠殘間蟋蟀

水花紅刺見蜻蜓豈館雨晴蝴蝶飛忙漸少吟詩思

閒睡早不知花放曉心閒但覺蝶飛忙漸少吟詩思

作佛不多栽樹爲看山皆可傳借全篇不記憶矣翁

覃溪序云帶綠草堂者太淑人教子處時帆所繪雪

窗課讀圖卽其地也時帆出庶常躋學士掌成均自

中祕之書館垣之課藝林之訓故周弗賅記而所最
日熟不忘者尤在此三十餘章是則雨聲鏗影所不
能傳而教孝作忠之職志也余謂端靜節行足希古
列女其雁字詩三十首寄興遙深非復尋常賦物益
松詩託物自道辭意高潔皆必傳之作以刊本甚稀變例全錄

雁字三十首次韻

木天悵望愧雕蟲那及天然點畫工小抹淡隨寒露立半
橫細入淺雲籠三千古碣文誰檢十二高臺興不窮瀕氣
長空眞漱盡筆端清味積來雄

昨夜豐山響石鐘霜前一字寫秋容蠻書細畫來平楚戍
東新封寄古邕苔徑輸他蝸篆瘦松林蘸得墨煙濃鴛行
若許同揮翰舒翼趨階貌木恭

健翮扶搖未肯降連篇橫拂洞庭艘霞蒸玉筍梭梭直風
散銀鉤筆筆雙石室飛花迷暮靄漁燈涵影入秋江天涯

多少傷心客莫寫嘸痕近客窗

萬象包羅一卷詩破空描出水天思誰云鳳沼專歸勛可
惜鵝羣已贈義秋雨迷離人問渡野雲黯淡客臨池鹿鳴
宴及來賓日珊瑚精金著意披

石函百仞倚晴暉拭眼丹霄妙入微沙白新翻黃紙硬山
青全印墨痕肥文心向晚通神速旅夢隨風認是非一自
蘇卿書寄後爲人辛苦北南飛

一隊縱橫掃碧虛亂峯遙隔數行疎五湖到處常逢汝人
法何須強問渠偶惡弦鳴因閣筆詎憂糧乏便傭書羨他
空闊波瀾老妙稱頻年澤國居

淋漓界破碧天圖醉墨微茫抗酒徒若使太元生瓦屑誰
將飛白裹金甌沙痕已印梅花瓣聲譜兼諧鳳穴雛野鶩

家雞隨舉似不須仿本效村儒

辛苦鴝原顧影齊天涯未怕道途迷孤飛斷港偏鋒掠倦
宿寒汀一筆低蕭館停雲分舊榻榆關落葉送新題書空
咄咄真何謂往事淒涼雪後泥

揮毫到處素心偕不羨梧岡韻獨嗜誰解索書汀有鶴欲
勞題壁石如螭軒軒健格頭初舉渺渺晴霄日試措秋水
長天鄉夢遠苦吟何地問津涯

足下風煙任翦裁何人能識倚天才久從碧落碑前過直
到青雲梯上來吳楚通流波並偃關山列陣筆難摧頻將
游霧縈空法寫向危峯第一隈

遠眼模糊望不真曉窗寂寞問歸人有形字更憑誰指無
譜書偕造物論極浦生潮初潤玉晴沙如雪宛鉤銀奇山

岩外留題徧北到幽燕西到秦

逸氣沈酣映日曛冥冥橫灑五花雲秋潭倒卧龍蛇影晴
磧新增蝌蚪文一畫直同天地老六書何待古今分祇應
上界留眞本不許傳流鳥雀羣

撇過雲羅沒點痕自然成象悟乾坤雙飛合寫新夫婦同
姓能書好弟昆秋雨人家題畫閣晚潮空舍浣花村傳神
一入林良手撫得蒼碑缺畫存

湘妃寫恨滿琅玕共此秋心入塞翰琴外送聲傳妙趣江
頭落影漾文瀾漸高勒帛銀河近小注淩波錦鞵乾結想
衡陽峯頂上那教俗手揣毫端

妙墨虛無曉度關題殘楚澤與吳山煙波以外分明見風
水之文宛轉嫺鳥跡居然瀆古在天書定自玉皇頒稻梁

詎息翺霄志臨罷黃庭半日閒

秋色清華斷碣邊翠微千丈素羅箋
宵征靜錄天人策尺幅橫描山海篇
點水超超真入妙飛空草草便成顛
蒼苔識得岫嶂跡驛使無煩召謫仙

結體崢嶸取勢遙長風捧出麗丹霄
蔚藍中曳千行墨遠碧濃塗十幅綃
寒暑未停文苑筆雲霞好入太平謠
一從漢武歌成後高駕飛虹躡彩橋

結構虛靈宛象爻低昂欹整翼相交
雲書跋尾湖山卷梵體當頭鸞鷺巢
骨瘦似圍飛燕似格高不付小胥鈔
數聲已作秋聲賦更掠纖波軼白茅

霜雪猶呵欲凍毫湘江鎮日註離騷
罡風洶湧心花怒溼霧模糊筆漬高
雲泚玲瓏排小隸煙絲珍重繞靈瑛
銜蘆

夏負藏身哲始信書生富六韜

天門初闕榜銀河可有鴻裁眾口哦夜市千家賣竹扇秋
雲一片印花羅側因驚吹疑神助浴盡長波試醉魔毛羽
自豐標格好肯將文字作身囚

莫嗤春蚓與秋蛇不闕儒生夢裏花塞外文光天在下江
南書舍水無涯枯藤倒影山溪瀑新月橫鉤石徑沙玉柱
飄零琴韻斷醫愁何術學塗鴉

江北江南水氣蒼共隨今雨入漁莊芙蓉垂露迎秋色沙
漠奔泉背夕陽醉寫何妨輪草聖暗摸終恐誤中郎真經
要借空空手漫把鵝羣贈與王

小作欹斜一畫輕縱橫成陣亦分明秋光慘淡文章老霜
氣沈酣天地清濡筆儘隨波浪闊傭書可減稻粱爭教他

董趙生慚愧妙蹟通神不近名

霜冷吳江夜抖翎燒殘野火當藜青雨餘神鬼連宵哭漏
靜蛟鼉隔水聽極浦航歸因草草遶灣煙霽一星星雲龍
山下空回首點筆山人放鶴亭

天與雲霞作刻藤橫空腕力得風增瀟湘情怨詩千首羅
刹晴潮墨一升小住鷗波憑浩蕩幾時鳳闕許飛騰迷離
苔蘚黃昏蝕細辨碑陰月是鐙

珍重寒衣萬里投亂砧聲裏斷雲流發書有淚傳青塞罷
織誰家倚翠樓繡被易涼人易遠回文難學婢難偷紅繩
足下仍牢繫妝閣歸來句再酬

江湖兄弟並書淫令節茱萸望遠心歧路分攜成折股順
風直下試懸鉞偶鳴得意鶯遷木忽寫離情鳥憶林草滿

池塘歸未遂欲尋佳句夢中臨

碧落高寒興正酣誰將揭本寄江潭水澄文苻波三折山
拭晴嵐石一函妙手眞從天半倚秋心全向筆端含浮圖
頂上曾題徧千佛名經獻彤幘

白雲淺處認牙籤朗朗眞宜衆目瞻波扶晴灘初紙拂露
研春草有花黏蕭蕭竹借凌霄管輅輅沙鋪對岸縑全力
拓開周萬里精神更聚在毫尖

起草飛從弱水巖春秋相值語呢喃人家江浦花封字使
者燕關雪凍函天上圖書無尺寸世間筆札別仙凡殷勤
愛煞清虛府好借輕雲畫素衫

詠盆中松樹

偃蹇依然水石清貞心獨結後凋盟生來不受人攀折雪

共荒寒月共明

彭玉嵌海鹽人平湖諸生陸煊室

詩話王嵌工詩詞書學鍾太傅薦季直表嘗日書詩
卷斷句如板橋黃葉雨秋水白雲船片雨斜侵閣夕
陽遠在山殘花隨雨落新竹上階生月色兼清露蛩
聲候早秋空山三日雪殘臘一枝梅久雨遲春色
田足水聲茶香過穀雨酒氣近蘭陵春盡鶯聲少
溪竹翠流疎鐘春市散殘角暮潮腥帆落九江影
聲三峽聲夕陽明遠樹秋水浸長天塔影杯中落
題沈虹屏春雨樓集後放暮雀雪巾歸皆清新可誦
人只有新詩妬汝虹屏後瑞鶴仙詞有云算來色
弄鳥絲寫未成卻拜良師是詩云十三嬌小不知
婦橫經曾作文書生人豔稱之大

春夜琴興

杜鵑聲裏一燈昏感舊思鄉不可論獨取焦桐橫膝上夜
寒彈月下花村

杪春

又是新篁解籜時東風二十四番吹碧紗窗展看春雨剩
有殘花一兩枝

秋夜懷梅谷客越

眞向山陰道上游日歸何日詠刀頭吳歌聽徹煙江月楚
簾涼生水閣秋唳縣東迴難著屐剡溪南下不通舟尺書
未寄寒衣薄莫眺天邊風露樓

虹屏夜臨歐書鐙燼落成燒痕以詩志之

秋風瑟瑟夜悠悠翠袖天寒尙寫歐忽聽鶯聲呼可惜鐙
花小燼落銀鉤

和虹屏秋感絕句

秋氣無端入骨蘇清愁自省亦模糊丹青只有騷人手畫
出傷心一片圖

沈彩字虹屏平湖人同縣陸烜側室有春雨樓集

詩話虹屏跋智永春雨帖真蹟云乾隆丙戌始并拜
夫人夫人以此帖還費遂易樓名曰春雨其集分賦
一卷詩七卷詞二卷文二卷題跋三卷葉鞠裳藏書
紀事詩有云燕坐花南水北亭文園消渴爲虹屏引
東湖叢記梅谷刊前晉齋叢書收藏甚富嘗見書估
攜來中統本史記後有梅谷跋侍兒虹屏書有梅谷
掌書畫史沈采虹屏印記又晏公類要後有虹屏跋
云晁氏郡齋讀書記謂六十五卷焦氏經籍志謂八
十卷而此僅三十七卷然其中有公四世孫表補闕
至歷代雜錄止蓋已爲足本矣曾南豐集有此書序
爰錄冠首時乾隆辛丑四月十二立夏日是歲閏五
月春事未闌海棠綉球木筆紫淵薔薇花尙繁盛新
狀初畢御研綾夾衣燕坐花南水北亭暖鏡溪新茗
書俱藏書家韻事也集中論婦人詩絕句四十九首
有獨到語

題臨獻之帖

江梅幾點漏春光
鵲眼新磨紫玉香
初試袂衣鶯語裏
小窗閒寫十三行

湖上次主君韻

偶然臨眺處花笑鳥能吟曲水流青草遙山映碧林燕來
雙翦冷雲去半湖陰徙倚風前柳柔情共爾深

避暑

避暑北窗下涼風吹幽襟蕉竹夾深翠仲夏如秋陰殘花
猶未盡寒蟬已先吟芳蘭供一缶石上陳清琴欲按山水
調纖爪力不任但取橫膝上一寄飛仙心

夜讀

被服純與綺流覽聖與儒豈爲榮名計簡編自堪娛棲鳥
中夜起明月臨前除皓皓清露冷蕭蕭竹影疎我思英皇
女千載不得俱復觀曹大家八志續漢書伊余慕前淑汲
古期有餘譬如月桂影而欲窮根株終當事蠶織私好徒

春日薄游

不須繡幕逐香車，小徑春明玩物華。
晷畫溪添三尺水，催詩雨送一枝花。
離離青草終無盡，的的紅顏信有涯。
準擬明朝鑽活火，太湖石上試新茶。

秋夜懷梅谷主君客越同夫人韻

爲訪靈威爛漫游

時主君應聘往范氏天一閣閱書

蕭蕭暮雨越溪頭已

凋蒲柳，千螺翠未老芙蓉一鏡秋。
明月雙彎無到雁，浙江三折阻歸舟。
不堪南望增惆悵，涼笛聲中獨倚樓。

次主君戲贈韻

大海珊瑚折一枝，鑊成彩筆寄吟詩。
臨池上擬岐陽鼓，敲句堅須博浪錘。
苦愛蠹書成脈望，不知霞臉去春肢。
外孫

蠶日終何用欲叩天關一問之

曉起作書因題

曉起弄筆札白露進窗几雖嫌皓腕冷滋潤亦可喜欲書
青李帖拂拭苔花紙漏痕無成心折釵有妙理悠悠千載
下可能入米史鬢絲簾影間染翰聊記此

初秋

佛桑花底坐涼颺正是幽閨七月時作畫應知特健藥鐫
書須倩伏靈芝甘回齒頰梨拳破碧照衣襟竹个垂欲寄
美人搖落思芭蕉和露寫新詩

清秋臨眺

清秋如靜女窈窕不多妝菱浦微彎月楓林小著霜山眉
修入畫波澹滑生光更擬褰裳去三湘晚芷香

與夫人論詩偶成

羚羊挂角處無跡少人知偶爾成佳句怕然何所思從來
蘭似草莫認菌爲芝微雨空閨裏茶香細論詩

秋夜書興

繡牀書軸闌精嚴寂坐紅閨夜已淹山子數聲如咒月風
姨一笑正寒簾椒蘭無氣香將燼巾舄生潮露暗沾擬把
簪花三寸管盡收清景入毫尖

初寒

殘菊猶存一兩桮清霜淡駐畫簷牙蝶驚年冷難依草蠅
戀微溫易入茶呵鏡白雲初滴雨卷簾紅葉故如花曉來
不覺肌生粟半臂妝成換穀紗

答鄰姝

長嘯月當窗微吟日卓午鄰姝謂余曰讀書徒自苦多謝
鄰姝言余心慕終古譬如蜂釀蜜性命藉爲主千函敵百
城萬事輕一羽但願長如此來生仍女姥

春日閒適

閒鋪翠毯拂雲箋血玉蛟螭鎮一圍春日花多裁句易雨
窗硯潤作書便將臨大令鵝羣帖擬賦莊生蝶夢篇不覺
鐘鳴時向午隔溪修竹上廚煙

晚興

雕欄品亞倦餘憑愛繪青春藻思仍小苑杏花三月雨高
樓藜火十年鐙閒情已入無何有好句常來得未曾便擬
下簾重展卷烏絲淡墨寫溪藤

古詩二首寄采芝山人

山人煙霞心筆墨師董巨獨立千仞岡嘯傲絕儔侶貌山
粉本收得句錦囊貯會上峨眉峯或泊鴛鴦渚清川泛長
薄落日淡容與依依隴首雲冥冥花間雨江海空青蒼采
芝在何處

我本青雲侶失足墮塵寰飄飄鸞鳳羣逸興不可刪拾翠
弄菴蒨採香佩蘭蓀麻姑向我笑手挽雙髻鬟白玉飾姸
貌丹砂駐酡顏言寫黃庭經仍歸青要山從君采芝朮白
雲非人間

述書

不知春蚓與秋蛇嫡嗣山陰第一家曾彷彿金釵爲轉折誰
云花骨有欹斜焚書空復嗟秦始煉石應須問女媧菡古
自難清勁易十年辛苦悔塗鴉

晚景獨坐遣懷

鉤簾暝色下松杉獨倚蘭干絮語喃薄醉懶添螺子黛嫩
寒初試杏花衫法書大半從人弄詩草無多且自芟故事
欲查鐙未上好教明月照開函

題自寫蘭

入春十日雨兼風蘭葉香遲未破叢差喜硯田初解凍墨
花爭發翠毫中

有日本人索余書戲作

簪花妙格幾曾慳萬里鯨波到海山不似唐宮一片葉只
隨清水向人間

姚世鑑字金心歸安人諸生王豫室

卧病

卧病逾時歲又新
衡門兩版絕羈塵
垂簾怕放東風入
春到貧家不當春

張粲字疎影江甯人員外郎許承欽側室有適燕吟

詩話疎影秀眉目鬢髮玉膚性慧而靜善讀書年十五侍承欽攜居武林玉壺外軒中窗外蒔花繞欄疎影執香烹茗日宴坐其間案頭唐詩一函蘭亭一卷臨摹吟詠不倦

樓居偶成

一竿晴旭上簾鉤
點點寒山翠入樓
多病懶裁鸚鵡賦
薄寒初御鷓鴣裘
香浮竹葉杯中影
聲徹梅花笛裏秋
平楚蒼茫驚欲雪
澹煙如織迴生愁

舟中立秋

金井梧桐墜輕寒
漸中久妾心如落葉
回首惜青春

信至

門前綦履跡，閭外笑談聲。怪得銀缸裏，燈花夜夜生。

七夕懷武林諸姊妹

烏鵲橋邊夜渡秋，穿鍼記共上高樓。那知萬里銀河水，瀉入南天盡是愁。

對鏡憶冰綃姊

昔年謐繡對青江，倚檻迴看玉一雙。今日鏡中惟瘦影，含情不忍向寒窗。

聞鄰家撫箏

誰家銀甲弄春陰，絃上深情指下生。彈到斷腸渾不住，應憐漂泊在京城。

晚春

春事闌珊鎮日陰，客中消息斷腸吟。妾心正似橋頭柳，不

遇東風恨不深

弄簫

小欄閒品玉參差
偷眼嬌花綻幾枝
曲罷巡檐聊聘望
秦樓煙雨正迷離

夢秦淮別業

曾登快閣看嬌紅
轉眼春光入夢中
安得翩躚同燕子
隨風吹過大江東

王煒字辰若一字功史太倉人諸生陳光綽室有燕譽樓橐

詩話辰若系出相門博學敦古如老師宿儒工詩善畫

西冷閒詠

澄江迴抱古城斜
一片煙雲接永嘉
爲愛好山聊駐足
偶

依高樹便成家湖光澈濫侵行笈竹影參差帶落花聞道
故人將卜隱短衣雙挽鹿門車

呂坤德字靜齋漢軍旗人有襄平女子詩彙

雜詩

茫茫弱水隔丹邱羅襪緇塵感去留識字更添今日障散
花恐惹後人愁靜觀冰雪心源澈得卧煙霞世味休一任
山光來比並撩人眉黛拂城頭

汪瑤字雲上休甯人朱昂室

寒山

趙凡夫樓
隱於此

飛雨過羣嶺籃輿陟翠微幽徑入松際輕風吹人衣高士
有遺跡想見疏鑿時老屋就深樹寒泉瀉平池墓梅雙蚪
龍屈鐵盤高枝緬懷碩人軸偕隱賦樂饑已辭梁棟材自

遠太廟犧一門擅文藻淵雅良可師

凡夫及子靈均工古篆配陸卿子工詩子

婦文倣工寫花鳥

予亦慕高隱願采商山芝鹿門期可遂懷古生

遐思

顧有容字香圃吳縣人兵部侍郎吳玉綸側室詩附玉

綸香亭詩藁

賦得月如弓

新月盈盈掛晚晴人從小院憶邊情長空射處旄頭落好

卜滇池奏太平

秋竹

涼露娟娟引晚風幽篁篩影月明中窗前一簾蕭蕭響添
卻秋聲更不同

王筠字松坪長安人直隸知縣元常女詩附刻其父西

園辦香集後

明妃怨

紫臺風急雁聲愁去國離家不自由
獨有穹廬深夜月清光不異漢宮秋

史筠字湘霞浙江石門人鎮海余耀室有蘿月軒詩集
憶遠吟

車馬行時春之初梧桐葉落秋何如
淒涼憔悴空閨裏珠箔垂垂獨自居
忽逢雲外秋歸雁一紙家書如覩面
感君念妾意纏綿濯指開鍼腸欲斷問君
畢竟幾時還妾已愁消紅粉顏幾回夢
繞關山道相思不斷如連環相思相思
無處說捲簾訴與天邊月明月已圓人未圓
素輝偏照孤帷前商飈蕭瑟寒機動蟋蟀聲中愁不眠
小鬟夢嚙呼不

醒起來自撥殘鐙影窗前恨煞長鳴雞一聲曉起霜天冷

病中述懷

病爲愁侵無計舒那堪一卧兩旬餘自來自去窗前月相近相親架上書奢望肯隨梅冷淡病軀卻似竹空虛倩人扶起臨青鏡舊日形容竟不如

中秋後春暉歸家口占

游子還家乍解鞍慈幃侍奉已承歡歸期雖負中秋約蘭桂庭前月未殘

周瑤字蘭嶼號蘗卿嘉善人武功知縣鼎樞女歸安禮部尙書諡文僖姚文田室有紅蕉閣詩集

詩話文僖邈雅堂文集中有周夫人壙誌銘題紅蕉閣主人遺象記言夫人溫粹跌麗光華動人武功初見文僖文賞之欲字以女或言如太貧何夫人母僞爲甥女相攸者問夫人曰頃人來爲甥女議親一能

文而貧一不學而富二者宜何擇夫人對日能讀書
者佳耳議始定既歸伉儷相愛爲小詩清麗婉約不
多作附存

文僖集中

答外子渡太湖寄詩

已聞黃葉下秋波兩地離愁誰較多願得曲湖歸賜日爲
君親手織漁蓑

王瑤湘南海人諸生隼女李孝先室有逍遙樓詩

秋琴

美人秋札至貽我金徽琴一鼓離鸞曲誰人知此音寒霜
譜哀調淡月洗孤心何事王孫女千秋遺恨深

擬送別

孤舟暮歸去別路江南樹煙外有鐘聲故人在何處
許飛雲字天衣吳縣人王又溟室有浮家集燕游草

謝別觀察夫人

自憐生薄命，荆布一蛾眉。
何意雲天誼，深承禮數知。
別時增繾綣，歸日更支離。
回首秦淮水，悠悠寄夢思。

瓶中丹桂

西風蕭瑟透芸窗，金粟凝香吐嫩黃。
祇恐秋光易凋絕，瓶深護一枝芳。

商采字雲衣，浙江山陰人。諸生羅萼青室有花間草錄。

窗草

落花

走馬迴塘細草齊，有情常自逐春颺。
且教天上看成雪，敢恨人間踏作泥。
紅板幾條村徑杳，青煙一片酒旗低。
紛紛蜂蝶還無數，翠閣朱樓路已迷。

淡抹斜陽欲暮時看花猶是惜歸遲餘香不信全消日瘦
影重疑未放枝草滿長隄成遠望山圍故國剩相思清尊
短拍年年事腸斷深閨祇自知

塞上曲

萬里長雲暗節旄天山秋盡雁飛高風吹塞馬霜蹏疾雪
撲征衣陳寶刀

角弓白羽挂雕鞍醉卧河陽鐵甲寒烽火夜來知有敵一
時齊向月中看

錢聚瀛字斐仲號餐霞女史秀水人布政使寶甫女諸
生戚士元室

放言

白雲出沒山之巔中有仙客如枯禪眸子炯炯衣跣跣

然啟齒呼我前我憎凡俗再稽首仙人隔雲更招手呼爾
來勿爾咎海邊明月難常圓仙子豈無塵中緣今來適爾
謫數滿攜爾且住滄海邊充腸魚肉應厭飫藥苗芝草常
新鮮人間濁酒那可飲何如山中一勺飛來泉荆山之鼎
紫金之丹授爾寶訣能延年丹成服食皆神仙翩然駕鶴
冲高天不知天闕近但覺天風寒兩行天樂遙相引調笙
握管乘青鸞下窺塵世在何所黃雲白霧交漫漫下臣有
一語願得上帝然不作朱門之貴客願作蓬萊之雲煙

懷陸費季齋表姊

重逢應有喜何事轉生悲我已愁如許君今鬢有絲縱圖
良晤久先恨別離時擬卜牆東舍終身共詠詩

憶昔聯牀夜相攜意最慙更闌頻翦燭興到總論文落拓

誰憐我知心獨有君莫嫌書札杳操紙思繽紛

金孝維字仲芬嘉興人禮部主事潔女同縣戶部郎中

錢豫章室有有止廬詩鈔

詩話仲芬爲檢門總憲女孫香樹尙書孫婦性清嚴寡言笑處事寬而有制衍石給諫警石學正皆其從子集中各有文紀其言行晚年子孫天折給諫歲除歸省元旦謁祠畢誦放翁詩曰嘉定三年正月後不知更醉幾春風因曰吾不可謂不壽然亦苦壽耳卒年九十有七詩中述事書懷諸作可見至情

集近水樓居分韻得鵲字

居閒客過稀門巷喧晴鵲幽人共相訪不負前期約命婢煮新茗呼童整清酌論文輸封胡禮法饒鍾郝談笑雜琴書善戲不爲虐佳會忘夜闌從教涼月落

六旬初度書懷

日月不可駐疾如駒過隙我年甲巳周老境苦催迫視聽

雖未衰鬢髮欲垂白感慨對生辰長歌憶疇昔自我奉箕
帚家事多屯厄綢繆樂歲寒屏當供賓客午夜共黶膏吟
吾閒刀尺君時課兩弟辛苦朝復夕詩律戒平庸文章慎
凡格安貧少閱牆樂道忘交謫獻賦走長安春風徒點額
歸來卧茅屋遺悶惟琴弈簷花幾度紅庭草幾回碧壯志
惜未施年華欲虛擲一朝運重開昆季俱通籍紛署與冰
垣聲名誇奕奕所居雖各巷來往無閒隔秋月春花賞
心聯綺席知止遽懷歸更卜城西宅優游歲月長逸興寄
泉石鴻案喜雙清鹿門願初適鵲原忽抱慟悲感日增積
卧病動經年葳苓兩無益今春幸漸瘳瘦比經霜柏有酒
且同斟養生在夷憚卅年憂與樂回首皆陳跡達觀任所
之人壽詎能百

讀德風亭集

金陵詹文木校室人王氏貞儀博覽淹通著天文術算諸書凡十餘種卒年僅

十三

宏才茂學兼多藝閨閣應傳絕代名若使斯人今尙在不
辭蒼鬢拜先生

陳爾士字煒卿餘杭人員外郎紹翔女嘉興給事中錢

儀吉室有聽松樓橐

詩話煒卿通經史工吟詠治家有則督子保惠讀不
中程度夜不得息體素羸弱積疾成疾歿前一時猶
令幼子讀易牀下論說如平時

帳房

帷宮遺意裁量新幾間幾舍布帛均不宜謀邑宜謀野卻
以縫人作梓人軫耶蓋耶隨意指家具紛紛逐遷徙兩方
展疊是繩牀三足支撐爲曲几觀風行殿巧者作容數百

人安足錄君不見屬車九九行相屬馬上鱗鱗萬家屋

夜坐懷故山

止戈

鄉名在餘杭縣北

吾舊隱地僻少人行高閣對山起春雲如

草生庭昏煙影直石盡澗聲平此夜一輪滿相思空復情

江樓晚眺

望江樓外曲江橫水氣蒼涼暑氣清坐覺煙雲生几席何
來帆櫓點空明遠山猿嘯月初起古寺鐘鳴潮未平犀弩
雄風今歇絕弄波時見狎童嬰

唐太宗

義旗十八定關中五載旋成混一功象啟玉牀爭應命卷
繡金鏡欲全終高光大業何難及臧札清風奈不同更歎
禍機潛倚伏更衣竟日閉深宮

輯歷代后妃表成詩以落之

王政蘭閨始

范蔚宗后妃贊班政蘭閨
注蘭林殿名故言蘭閨

嬪風竹素貽二千

年往復三五月盈虧歷歷區賢倭悠悠迭盛衰帝皇權或

假紀傳體分歧虹電荒難問蘋蘩鑒在茲法宮明德冠內

則長孫垂孝養崇長樂訐謨下寶慈當熊樹奇節觀象式

清規秋扇班姬感春華左妹摛是家名不朽幾輩寵忘危

傍輦多慙態傾城詡豔姿流珠教記曲娥綠憤顰眉縹緲

芭蕉影蒼涼琥珀思鍼神工刺繡機絕妙牽絲閱武堂楊

柳涪州驛荔支簪留龍蕊貴袖拂鳳翼宜續命琵琶奏迴

波考杞詞批章黃案側稱制白紗帷北第捐絃誦東朝侈

宴嬉杜根空諍直董養任嗟咨銀鹿疇能設倉鵬詎可醫

鏡中希悟主方底忍埋兒色授應階厲才升亦受疵由來

通險謁終見覆邦基進退誠紛若遭逢信有之焚椒寃太甚擣附獄誰治莫慰含飴慕徒懷削脯悲宣仁滋謗牘顯肅誤歸期破碎瑤光錦凋殘玉樹枝興停過廟日刃脅渡河時紅葉飛無定瓊花落已遲偷生甘事虜練行乞爲尼喪亂同漂梗徵祥恰驗著鑄金胡弗就服赭類前知射卜門屏雀妖占產帳鳴徽音猶示異靈澤孰修祠戚畹仍恩遇侯封各指撝園林摹禁囿鼓角向邊陲沙麓潛成莽天元竟啟隋嬰蚡爭施奕珖濟等誅夷隆替如碁置愚蒙效管窺景濂編未備遷史法堪師校寫晨披翰參詳夜熬脂張楊從辨族宏本總傳疑誤頌刪劉毅簧言著郝隨蹟尋梁采女貞闡蜀昭儀詳見本表末學縑緗隘旁行粉墨施武韋眞倚伏邢尹漫妍媸斷代興於漢何人化自岐寸心衡得

失還詠二南詩

晚晴簃詩匯卷一百八十五終